

Cha Sañaha Ra Jesucristo Chi Ra Apóstol Juan

Cha nyehe ra Juan

1 Ican ihya cuví noo cha catyí Nyoo chi ra Jesucristo vatyí na sacoto ra chi ra casacuví tyiño nuu ra. Sañaha ra ñáá ndihi cha cucuvi cha numi ri. Noo ángel tachí ra Jesucristo vatyí sañaha ra chi yuhu ra Juan. ²Ta cahín cha ndaa ta cha ndicha cuenda tandihi cha nyehe. Ta cuví cha ndaa cuenda tuhun Nyoo ta cuenda tandihi cha sacoto ra Jesucristo.

³Sii xaan cuñí ñu sacuha tuhun cha nyaá nu tutu tuhun Nyoo ihya. Ta sii xaan cuñí ñu chiñí tuhun cha cahán chi ta quichahá ñu, vatyí tandihi tuhun cha nyaá nuu tutu Nyoo, cha nyaña yatyin quivi cha cunyehe yo.

Nu sacuhun ra Juan tutu chi ndi ucha tahan vehe ñuhu

⁴Yuhu ra Juan sacuhín tutu ihya chi ndi ucha vehe ñuhu ñuu cha nyicú ityi Asia. Nyoo ta ndi ucha tahan Tatyí Ii ra cha nyicú nuu ra nu nyaá ra nyacá ñaha ra nu tyayu chichi gloria, na nasoco ra chi ndo. Ta na coo cha taxi ri añima ndo sahá ra. Nyoo ican ra cuví ra iyó

vityin, ta iyó maa ra quivi quichaha tandihi, ta ican ra cuquichi. ⁵Ta naquehen tucu ndo cha vaha cuan sahá ra Jesucristo ñandihí. Vatyí ican ra cuví ra cha ndaa vaha ta ra ndicha. Ta cuví tucu ra noo ra cha nandoto cha xihna ri ta tyicuan ri maa cucoo ra. Ta iyó ityi chi ra ta nyacá ñaha ra chi ra cacuví rey cha iyó siqui ñuhu ñayivi ihya. Ican ra cuví ra cha cuñí xaan chi yo. Ta sandachí ra cuatyí yo chihin niñi ra. ⁶Ta sacuvi ra rey chi yo. Ta sacuvi ra tata sutu chi yo tacuhva vatyí sacuvi yo tyiño nuu Nyoo Sutu ra. iNa sacahnu yo chi ra. Ta na cunyaca ñaha ra tyicuan ri maa! Ta tyicuan caa na cuví.

⁷iNyehe ndo! iCha vachi ra Cristo nu vico andivi! Tandihí ñayivi cunyehe ñu chi ra. Nyacua nya ñu cha sañicuehe chi ra ta cunyehe ñu chi ra. Ta tandihí ñu cucuacu chaa ñu chihin cha yuhví ñu na nanyehe ñu chi ra inga chaha vatyí suri maa ra cuví. Cha ndicha, tyicuan caa cucuvi.

⁸Catyí Nyoo:

—Yuhu cuví ra xihna cuiri, ta yuhu cuví ra cundoo nu ndihi tuhun —catyí Sutu yo Nyoo, ra

iyó tandihí tunyee iñi chi. Ican ra cuví ra iyó vityin. Ta iyó maa ra nu quichaha tandihí, ta ican ra cuquichi.

**Noo cuhva tyaqui cha sañaha Nyoo
chi ra Juan cuenda ra Cristo**

⁹Yuhu ra Juan cuví yañi nyoho. Ta iin ri nyehé yo tindoho. Ta iin ri nyacá ñaha Nyoo chi yo. Ta iin ri cunyee xaan yo ñáá ndihí cha cuví chi yo vatyí tyinyeé ra Jesucristo chi yo. Ñohó yuhu vehe caa noo ñuhú cha nañí Patmos cha nyaá mahñu tyañuhu. Ñohí vehe caa cha cuenda vatyí cahín tuhun Nyoo cha quichí sañaha ra Jesucristo. ¹⁰Ta cuví chi noo quiví cha sacahnú yo chi Sutu mañí yo. Ta ñihi xaan chinyaa Tatyí Ii Nyoo chihin. Ta chiñi noo ndusu ñihi xaan ityi chate, tari noo ndusu cha ñihi xaan tari ndusu trompeta. ¹¹Ta catyí chi chii tyehé caa:

—Yuhu cuví ra xihna cuiri, ta yuhu cundoi nu ndihí tuhun. Tyaá nuu noo libru tuhun cha nyehun, yoho Juan. Ta sacuhun chi ndi ucha vehe ñuhu cha nyicú ityi Asia. Sacuhun chi ñu nyicú vehe ñuhu ñuu Éfeso, chi ñu vehe ñuhu ñuu Esmirna, chi ñu vehe ñuhu ñuu Pérgamo, ta chi ñu vehe ñuhu ñuu Tiatira, ta chi ñu vehe ñuhu ñuu Sardis, ta chi ñu vehe ñuhu ñuu Filadelfia, ta chi ñu vehe ñuhu ñuu Laodicea —catyí ndusu cuan.

¹²Tyicuan ta nanyocavé vatyí cuñí nyehí yóó chi ndusu cha cahán chihin cuan. Ta nanyehí ucha tahan cañileru xuhun cuan. ¹³Ta mahñu ucha tahan cañileru cuan, nyehí chi noo ra cha caá tari caá noo rayii

ñuhu ñayiví ihya. Ñihnó ra noo sahma cañi nya nu chaha ra. Ta yihí ra noo sinchu xuhun cuan, ta nya nu nyaá pechu ra chitahan sinchu cuan. ¹⁴Ta cuichin ixi xiñi ra, tari ixi mbee cuichin, tari cha cuichin catyí. Ta tari cha cayú ñuhu chiti nuu ra. ¹⁵Ta xiñó chaha ra tari xiñó noo caa cha nañí bronce cha tuhva nducuaha nu cayú ñuhu chichi noo horno. Ta ñihi xaan ndusu ra tari ndusu cha cuaha vavaha yuvi nahnu. ¹⁶Ta yihí ndaha ra ucha tahan tiñoó andiví chiyo vaha ra. Ta tari caa noo mityi cha xaan ninduvi chiyo yuhu, (tyicuan caa tuhun cahán ra cha quitá yuhu ra). Ta tari caá cha ñihi xaan nyehé ñanyii cha xiñó vavaha, tyicuan caá nuu ra.

¹⁷Cuhva cha nanyehí chi ra, nduve chaha ra tari maa cha chihí. Soco maa ra tyiso ra ndaha chiyo vaha ra siqui, ta catyí ra chii:

—Ma yuhvun. Yuhu cuví ra xihna cuiri, ta yuhu cundoi nu ndihí tuhun. ¹⁸Iquen cuví ra cha nyitó. Ta vasi chihí soco vityin cuacoí tyicuan ri maa. Ta iyó ityi chii cha catyí ama tahan chi tuhun chihi chi noo noo ñáyiví, ta iyó ityi chii cha catyí tatu cuhun ñu anyaya. ¹⁹Tyaa nu libru tandihí cha nyehún, cha iyó vityin, ta cha cucoo nu cuahan ca chi. ²⁰Ican ihya cuví tuhun xehe cuenda ndi ucha tiñoó andiví cha nyehún yihí ndaha chiyo vahi, ta cha cuenda ndi ucha cañileru xuhun cuan cuan: Ndi ucha tiñoó andiví cuan cuñí chi catyí: ra cha cahán tuhun ucha tahan vehe ñuhu cuan. Ta ndi ucha cañileru cuan cuñí chi catyí ndi ucha vehe ñuhu cuan.

**Tuhun cha sacuhun ra chi ñu
nyicú vehe ñuhu ñuu Éfeso**

2 'Sacuhun tutu chi ra cahán tuhin chihin ñu nyicú vehe ñuhu cha nyaá ñuu Éfeso. Ta çatyun chi ra tyehe caa: "Tyehe caa catyí ra cha yihí ndaha ucha tiño chihin ndaha chiyo vaha ra. Ta chicá noo ra mahñu ndi ucha cañileru xuhun cuaan: ²Yuhu chité tandihí cha sacuví ndo. Chité vatyí ñihi xaan tyiño sacuví ndo. Ta cunyeé xaan iñi ndo. Ta chité vatyí ña cunyeé iñi ndo nyehé ndo chi ñu quiñi iyó. Ta chité vatyí tuhva ndo nducu nyehe ndo chi ra cha catyí vatyí tyiño Nyoo chica noo ra soco ña ndicha ra. ³Cunyeé xaan iñi ndo. Ta nyehé xaan ndo tindoho ta cha sahá tyiño xaan ndo cha cuende chihin cha ña ndu uvi iñi ndo. ⁴Soco iyó noo cha caá ndo nui. Vatyí ña cuñí vaha ca ndo chii tari quivi xihna ri. ⁵Yucuan chaha ñicohon iñi ndo nya maa maa cuví nu ña vaha sacuvi ndo. Ta ñasama ndo cuhva iyó ndo. Ta sacuvi ndo tari cuhva chiyo ndo quivi natiin cuenda ndo notuhun Nyoo. Tatu ma nasama ndo cuhva iyó ndo, numi ri cuhin nu nyaá ndo, ta tinyai cañileru ndo nu nyaá chi. Soco tatu ndu uvi iñi ndo cuatyí ndo, ma tinyai. ⁶Soco iyó tucu cha vaha nyacuví ndo. Vatyí ña cuñí nyehe ndo cha quiñi caa cha sacuví ñu yihí cuenda ra Nicolás. Tyicuan tucu yuhu ña cuñí nyehí yucuan. ⁷Ta nyoho cha cutuñi iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu. Catyí ra tyehe caa: Tatu cuví chasaha ndo chi ra ña vaha, cuhve

cha cachi ndo chiti yutun cha chahá cha conyito añima ndo. Ta yutun cuan nanyaá tun nya nu iyó Nyoo andivi, ta cuñihi ndo tandihí cha vaha cha iyó yucuan."

**Tuhun cha sacuhun ra Jesucristo chi
ñayivi nyicú vehe ñuhu ñuu Esmirna**

⁸'Sacuhun tucu tutu chi ra cahán tuhin chihin ñu nyicú vehe ñuhu cha nyaá ñuu Esmirna, ta çatyun chi ra tyehe caa: "Tyehe caa catyí ra cuví cha xihna cuiri, ra cundoo nu ndihí tuhun, ra cha chihí ta nandoto: ⁹Yuhu chité tandihí cha sacuví ndo. Ta chité tindoho cha nyehé xaan ndo. Ta chité cha ndahvi ndo. Soco chihin tuhun Nyoo, tyayii ndo. Ta chité yoso caa ñu cha catyí vatyí ñu Israel cuví ñu, ta cahán ña vaha ñu siqui ndo. Ta ni ñima ñu Israel cuví ñu vatyí noo ityi ñu yihí cuenda ra ña vaha, ra nañí Satanás, cuví ñu. ¹⁰Soco ma yuhvi ndo cha cunyehe ndo tindoho. Vatyí ra ña vaha cutyihí ra vehe caa chi suhva nyoho, vatyí cunducu nyehe ra chi ndo tatu cusaña ndo chi Nyoo. Ta uchi quivi cunyehe ndo tindoho. Soco cunyicon vaha ndo chi Nyoo nyacua nya quivi cúvi ndo. Ta yuhu cuhve ñayivi coo ndo chihin Nyoo. ¹¹Ta nyoho cha cutuñí iñi ndo tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu. Catyí ra tyehe caa: tatu cuví chasaha ndo chi ra ña vaha, ña tahán chi cuhun ndo anyaya, nu cutachi tuñi Nyoo chi añima ña vaha."

**Tuhun cha sacuhun ra Jesucristo chi
ñu nyicú vehe ñuhu ñuu Pérgamo**

¹²'Sacuhun tucu tutu chi ra cahán tuhin chihin ñu nyicú vehe

ñuhu ñuu Pérgamo. Ta catyun chi ra tyehe caa: “Tyehe caa catyí ra cha nyisó mityi cha xaan ndinduvi chiyo yuhu: ¹³Yuhu chité tandíhi cha sacuví ndo. Ta chité vatyi iyó ndo nu nyacá ñaha cuihna, ra ñańi Satanás. Soco tyicuan ri chinó ińi ndo chii. Ta vasi nu canyicú ndo chińa chahńi ñu chi ra Antipas, ra cha cuví noo cha ndoo cuende, vatyi chińa chicá noo ra cha ñańi Satanás cuan. Soco ni ri maa chahńi ñu chi ra, nyoho ña sandíhi maa ndo tuhun cha chinó ińi ndo chii. ¹⁴Soco catuví suhva cha caá ndo nui: Vatyi nu nyicú ndo nya Pérgamo chińa, yihí ra cha ña cacuńi ra sańa ra cuhva cha sacuví ra Balaam. Ta maa ra Balaam tyiyuhú ra chi ra Balac, na sacachi ra chi ñu Israel nyayu cha chiyo nu sacahnú ñu chi xitohyo. Tyiyuhú ra chi ra nacatyí ra chi ñu vatyi ñahri caa cha coo ñu chihin tahan ñu vasi ñima yíi ñu cuví, o vasi ñima ñasihi ra cuví. ¹⁵Ta suri iyó suhva ñáyivi mahńu ndo cha ña cacuńi ñu sańa ñu cuhva sańahá ra cuenda ra Nicolás. Ta yuhu ña cuńi nyehi cuhva sańahá ra cuan. ¹⁶Yucuan chaha numi ri ñasama ndo cuhva iyó ndo. Vatyi tatu ma nasama ndo cuhva iyó ndo, cuquichi siqui ndo cha numi ri ta cacańi tahn chihin ñu cuan chihin cha tari mityi cha quitá yuhi. ¹⁷Ta nyoho cha cutuńi ińi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu: tatu cuví chasaha ndo chi ra ña vaha, cucuhve cha cachi ndo noo pan maná cha ñohó xehe. Ta cucuhve noo yuu cuichin chi ndo. Ta nu yuu cuan cucunyaa noo

sivi chaa cha yori chitó. Ta noo tuhun ri ñu cuquehen cuenda cuan cucoto.”

Tuhun cha sacuhun ra Jesucristo chi ñu nyicú vehe ñuhu ñuu Tiatira

¹⁸Sacuhun tucu tutu chi ra cahán tuhun chihin ñu nyicú vehe ñuhu cha nyaá Tiatira. Ta catyun chi ra tyehe caa: “Tyehe caa catyí Sehe Nyoo, ra cha caá chíti nuu tari noo cha cayú ñuhu. Ta tari caá noo caa finu cha ñańi bronce cha xińo xaan, tyicuan caa chaha ra: ¹⁹Yuhu chité tandíhi cha sacuví ndo. Ta chité yoso cuhva cha cuńi ndo chi ñáyivi. Ta chité cuhva cha chinó xaan ińi ndo chii. Ta tyinyeé ndo chi tahan ndo. Ta cunyeé xaan ińi ndo. Ta chité vatyi cuaha ca cha vaha sacuví ndo vityin ta ñima ca ta nu quichaha. ²⁰Soco iyó noo cha caá ndo: Vatyi chahá ndo ityi chi ñaha cha ñańi Jezabel na sańaha ña chi ndo. Catyí ña vatyi cuenda Nyoo cahán ña. Soco chihin tuhun cha sańahá ña, sandaví ñaha ña chi ñu sacuví tyińo nui. Vatyi sańahá ña cha coo ñu chihin inga rayii o ñusihi ta ñima yíi ñu o ñasihi ra cuví. Ta sańahá ña cha cachi ñu nyayu cha chiyo nu sacahnú ñu chi xitohyo. ²¹Yuhu cha nyatú xain cha nasama ña cuhva iyó ña, soco ña cuńi ña nasama ña. Vatyi ta sandoo ca ña cha iyó ña chihin rayii ta ñima yíi ña cuví. ²²Ta vityin cua quehen noo cuehe chi ña. Ta cua cuhvi ña. Ta ma cuví nducuita ña. Ta ñu sacuví cha quińi caa chihin ña, tatu ma ndu uvi ińi ñu, cucuhve noo tindoho nyehe ñu. ²³Ta cacahńi chi sehe ña. Ta

tyicuan caa, coto tandihí ñu nyicú vehe ñuhu, vatyi yuhu chité tandihí cha chicá xiñi ñu, ta tandihí cha caá añima ñu. Ta chi tahan tahan nyoho cucuhve cha tahán chi chi ndo yoso cuhva cha sacuví ndo.

²⁴Soco chi tandihí ca nyoho ñuu Tiatira, cha ña quehen ndo cuhva cha sañahá ña, ni ña sacuví ndo cha catyí maa ñu tuhun nahnu cuenda ra ña vaha, ña tyafí inga tuhun cha yíi siquí ndo. ²⁵Soco ma saña ndo cuhva cha vaha nyacuví ndo nyacua nya quichi. ²⁶Ta nyoho tatu cuví chasaha ndo chi ra ña vaha, ta sacuví ndo cuhva cuñí nyacua nya nu ndihí tuhun, cucuhve ityi chi ndo cha cunyaca ñaha ndo chi ñu ñuhu ñayiví. ²⁷Tari chahá Suti ityi chii cha cunyaca ñahi, tyicuan caa cucunyaca ñaha ndo. Tari cha chihin noo yutun caa cutachi tuñi ndo chi ñu. Tari tahvi cuatyí minoo quisi ñuhú, tyicuan caa cusacuví ndo chihin ñu. ²⁸Ta cuhve tiñoocahnu andiví cunyaa chihin ndo. Ta ican yuhu cuví cuan. ²⁹Ta nyoho cha cutuñí iñi ndo tyasoho ndo ñáá cha catyí Tatyí Ii Nyoo chi nyoho, ñu nyicú vehe ñuhu.”

Tuhun cha sacuhun ra Jesucristo chi ñu nyicú vehe ñuhu ñuu Sardis

3 Sacuhun tucu tutu chi ra cahán tuhun chihin ñu nyicú vehe ñuhu ñuu Sardis. Ta catyun chi ra tyehe caa: “Tyehe caa catyí ra cha yihí ndaha ndi ucha Tatyí Ii Nyoo ta ndi ucha tiñoocahnu andiví: Yuhu chité tandihí cha sacuví ndo. Ta vasi catyí ñayiví tyi nyitó ndo soco cha cuenda chi yuhu, chihí ndo. ²Saha cumi vaha ndo

chiin ri ca cha vaha cha iyó chi ndo. Vatyi cha cuñí ndihí tuhun nu nyicú ndo. Vatyi nyehí vatyi cha sacuví ndo, ña vaha maa nuu Nyoo. ³Nicohon iñi ndo tuhun vaha cha cutuhva ndo. Cunyicon ndo cuhva cuan, ta nasama ndo cuhva iyó ndo. Vatyi tatu ma naquehen vaha ndo cha vaha, sana iñi ndo ta cuquichi siquí ndo, tari tuhva ra suhu quichi. ⁴Soco iyó suhva nyoho ñu Sardis chiña cha ña sacuví ndo cha quiñi caá. Ña sacanyahyu ndo sahma ndo cuví cuan. Ta maa ndo cucuihno ndo sahma cuichin chihin. Ta cucaca noo ndo chihin, vatyi tyicuan caa tahán chi chi ndo. ⁵Ta nyoho tatu cuví chasaha ndo chi ra ña vaha, cucuihno ndo sahma cuichin chihin. Ta ma sanai sivi ndo nu libru ñu cuaconyito chihin Nyoo. Ta cunacoto nui chi ndo, chihin nuu Suti, ta chihin nuu ángel. ⁶Ta nyoho cha cutuñí iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu.”

Tuhun cha sacuhun ra Jesucristo chi ñu nyicú vehe ñuhu Filadelfia

⁷Sacuhun tucu tutu chi ra cahán tuhun chihin ñu nyicú vehe ñuhu ñuu Filadelfia. Ta catyun chi ra tyehe caa: “Tyehe caa catyí ra ii, ra ñahri cuatyí, ra cha ndicha vaha, ra cha ndaha ndaha ticu rey David, ra cha nuñá yuvehe ta ni noo ñu ta ma cuvi nacasi ñu. Ta tatu nacasi ra, ni noo ñu ta ma cuvi nuña ñu. Tyehe caa catyí ra: ⁸Yuhu chité tandihí cha sacuví ndo. Ta nuu ndo nuñe noo yuvehe. Ta yori cuví nacasi, (vatyi chahí cha cahan ndo tuhun

Nyoo chihin ñáyivi, ta yori cuví casí). Ta vasi chiin ri fuerza ndo, soco quichahá ndo tuhun cahín, ta ña catyí ndo vatyí ña ñohó nuu ndo chii. ⁹Ta ñu cuenda ra ña vaha, ñu cuendu, ñu catyí vatyí ñu Israel cuví ñu, ta ñima, cusacuiñi chiti chi ñu nuu ndo, tacuhva coto ñu tyi yuhu cuñí chi ndo. ¹⁰Ta sacuví ndo cha catyí, vatyí cunyeé iñi ndo. Ta yucuan cuenda cusaha cuende chi ndo chihin tindoho cahnu cha cusaquichi siqui tandíhi ñáyivi, vatyí cunducu cote chihin tandíhi ñu iyó siqui ñuhu ñáyivi tatu cuñí ñu chii. ¹¹Numi ri cuquichi. Saha vaha ndo cuenda cuhva iyó ndo, coto yóo cha tinyaa premio cha cuñihi ndo. ¹²Nyoho tatu cuví chasaha ndo chi ra ña vaha, cahnu ca tyiño cucuvi ndo nuu Nyoi. Ta ma canyaha ca ndo nu nyaá Nyoo. Ta cutyai sivi Nyoi chi ndo, ta sivi ñuu Nyoi, ñuu Jerusalén chaa cha cusaquichi Nyoi nya andivi, ta suri cutyaa tiqui sivi chai chi ndo ñandíhi. ¹³Ta nyoho cha cutuñí iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu.”

Tuhun cha sacuhun ra Jesucristo chi ñu nyicú vehe ñuhu ñuu Laodicea

¹⁴Sacuhun tucu tutu chi ra cahán tuhun chihin ñu nyicú vehe ñuhu ñuu Laodicea. Ta catyun chi ra tyehe caa: “Tyehe caa catyí ra cha ndícha vaha, ra cuví cha ndaa vaha cha cahán cha ndícha, ra cha savahá tandíhi cha iyó chihin Nyoo. ¹⁵Yuhu chité tandíhi cha sacuví ndo. Ta chité vatyí ni ña cuñí vaha ndo chii. Ta ni ña cuñí tucu ndo saña ndíhi ndo chii.

Vaha tyehe ta saña ndíhi ndo chii, o sañihi ndo quichaha ndo tuhun cahin, vaha. ¹⁶Soco vatyí chiin ri cuñí ndo chii, ta ni ña saña ndíhi ndo chii, ta ni ña cuñí ndo sacuvi ndo tuhun cahin, yucuan chaha cusanaa ndíhi iñi tuhun ndo. ¹⁷Vatyí nyoho catyí ndo tyehe caa: Yuhu tyayii, vaha iyé, ta ñahri ca maa cha chiñuhú chii, catyí ndo. Ta ña chitó ndo vatyí cuví ndo noo ra ña sii cuñí, noo ra ñahri iyó chi, noo ra ndahvi, noo ra cuaa, noo ra vityiyaa cuví ndo. ¹⁸Yucuan chaha chahí tuhun chi ndo vatyí chi mai sata ndo xuhun cuaan vaha cha yahá nu ñuhu ta ña cayú, tacuhva na cutyayii ndo. Ta chi mai sata ndo sahma cuichin vatyí cuihno ndo, tacuhva cha ma cucahan nuu ndo vatyí vityiyaa ndo. Ta tyíhi ndo colirio chiti nuu ndo tacuhva na nanyehe ndo. ¹⁹Yuhu chahí tuhun chi ñu cha cuñí xain chi. Ta tachí tuñi chi ñu ñandíhi. Yucuan chaha catyí chi ndo, ñasama ndo cuhva iyó ndo ta sacuvi ndo cha vaha. ²⁰Yuhu nanyaí yuvehe añima ñáyivi ta sacachén. Tatu nya noo ñu chiñí ñu ndusi, ta nuña ñu yuvehe, yuhu quihvi ta cuxiñi chihin ñu. Ta maa ñu cuxiñi ñu chihin mai. ²¹Cucuhve cha cunyaa ndo chihin nu nyacá ñahi tatu cuví chasaha ndo chi ra ña vaha. Tari yuhu cuví chasahi chi ra, ta vityin nyaí chihin Suti nu nyacá ñaha ra. ²²Ta nyoho cha cuví cutuñi iñi ndo, tyasoho ndo cha catyí Tatyí Ii Nyoo chi nyoho ñu nyicú vehe ñuhu” —catyí ra Jesucristo.

Noo cuhva cha sacahnú ñu chi Nyoo nya gloria

4 Cha yahá tuhun cuan, ta nyehi noo yuvehe tacoho nya andivi.

Ta noo ndusu cha tari caa ndusu trompeta chiñi cha cahán chihin cha xihna ri ta catyí chi chii:

—Ndaa ihya ta cusañahi chuun cha cuacuvi nu cuahan ca chi — catyí ndusu cuan chii.

²Ta caa cuhva ri cuan ta tuví iñi vatyi ñihi vavaha nyaá Tatyí Ii Nyoo chihin. Ta nanyehi noo tyayu nanyaá nya andivi. Ta nyaá noo ra nuu tyayu cuan. ³Ta ra nyaá cuan, xiño nuu ra tari xiño noo yuu vaha cha nañi jaspe ta cornalina. Ta nicachico yuhu tyayu cuan nyaá noo coo yahnyi, ta xiño ti tari yuu cha nañi esmeralda. ⁴Ta nicachico tyayu cuan nyehi oco cumi ca tahan tyayu. Ta nyicú oco cumi tahan ra cha vaha chahnu. Cañihno ra sahma cuichin. Ta yihí corona xuhun cuaan xiñi ra. ⁵Ta nu nanyaá tyayu cha nyaá mahñu cuan, yucuan quitá minoo tacha. Ta vaa ri ca maa cuví. Ta ñihi xaan cahán savi. Ityi nuu tyayu cuan cayú ucha tahan ñuhü. Ta ucha tahan Tatyí Ii Nyoo cuví cuan. ⁶Ta ityi nuu tyayu cuan iyó tucu noo cha tari caa tyañuhu, xiño xaan tari ino.

Nicachico yuhu tyayu cuan ta mahñu tyayu cuan, tayucú cumi tahan cha nyitó cha tari caa quitá ta tari caa ñáyivi caa. Ta cuaha xaan chiti nuu cuan nyicú, tari ityi nuu ta tari ityi chata. ⁷Cha xihna ri cha nyitó ihya, tari caá noo ndicaha caá. Ta cha cu uvi tari caá noo sindiqui caá. Ta cha cu uñi, tari caá nuu rayi caá nuu. Ta cha cucumi tari caá noo tasu cha cuahan ndava, tyicuan caá. ⁸Ta ndi cumi tahan cha nyitó ihya, tahan tahan chi ta nyaá iñu tahan ndichin chi. Ta

nicahnu maa chi nyaá chiti nuu chi, tari ityi chata chi ta tari ityi chichi ndichin chi. Ta ndiyaca ta ñiyaca ta ña chicuita chi catyí chi tyehe caa:

Ra ii xaan cuvún, ra ndii xaan cuvún, ra ñahri cuatyí cuvún, Sutu Mañi yuhu, Nyoo, iyó tandihi tunyee iñi chuun.

Ra cha iyó nu quichaha tandihi cuvún, Ta ra iyó vityin. Ta ra cha nyaá cha cuquichi.

⁹Ta cachahá ndi cumi tahan cha nyitó cuan gloria chi Nyoo. Ta sacahnú chi chi ra, ta canacuhvá chi tyahvi nyoo chi ra nyaá nu tyayu cahnu cuan, ra cha iyó tandihi tyembu. Ta tahan ri chaha cha casacuvi chi tyicuan caa, ¹⁰ta ndi oco cumi ra cha vaha chahnu cuan chicuñi chiti ra ta casacahnü ra chi ra iyó tandihi tyembu. Ta catyihí ra corona ra nu tyayu cahnu cuan. Ta cacatyí ra tyehe caa:

¹¹Sutu Mañi nyuhu, Nyoo cuvún chi ndi.

Chi yoho tahán chi cha cuhva ndi gloria, ta sacahnú ndi chuun.

Ta tahán chi cha cunyaca ñahun. Vatyi maun savahü tandihi cha iyó.

Ta cha cuenda cha iyó iñi maun ta chicoo tandihi, cacatyí ra.

Nu nyehę ra Juan noo libru ta noo Mbee Luhlu cha cuví ra Jesucristo

5 Tyicuan ta chiyo vaha ra cha nyaá nu tyayu cahnu cuan, nyehi yihí ndaha ra noo libru tari caá noo tutu cha natuvi yo. Ta nyaá letra ityi nuu ta ityi chata. Ta nyasí chi chihin ucha tahan sellu. ²Ta nyehi noo ángel cha nyee xaan. Ta

chaa xaan cahán ra ta ndacá tuhun ra:

—¿Yóó ra tahán chi nuña libru ihya ta sacanyaha ra sellu ihya? — catyí ra.

³Soco ni ityi andivi ta ni ityi nu ñuhu ñayivi, ta ni ityi chichi ñuhú, ta yori maa cha cuví nuña libru cuan. Ta ni cha nyehe ñu nuu, ta ma cuvi. ⁴Ta yuhu chacu chaa xain, vatyi yori maa quitá cha cuví nuña libru cuan. Yori maa cuví sacuahá, ta yori cuví nyehe nuu chi. ⁵Tyicuan ta noo ra cha vaha chahnu cuan catyí ra chii:

—Ma cuacu con. Vatyi ra cuví ndicaha o cuñi chi catyi, ra nyacá ñaha, ra vachi tata ra Judá, ra vachi tata rey David, ican ra cuví chasaha ra tacuhva cuví nuña ra nu libru cuan ta cahnya ra ndi ucha sellu cuan —catyí ra.

⁶Tyicuan ta mahñu tyayu cuan ta mahñu ndi cumi cha nyitó cuan, ta mahñu ra cha vaha chahnu cuan, nyehi chi noo Mbee Luhlu. Nanyaá ti ta caa ti cha chahñi ñáyivi chi ti. Ucha tahan ndiqui ti ta ucha tahan chiti nuu ti nyaá. Ta chiti nuu cuan ican cuví ndi ucha tahan Tatyí li Nyoo cha tachí ra nicacahnu siqui ñuhu ñayivi. ⁷Ta ra cuví Mbee Luhlu cuan chahan ra ta quehen ra libru cuan cha yihí ndaha chiyo vaha ra nyaá nu tyayu cuan. ⁸Cuhva cha quehen ra libru cuan, ndi cumi cha nyitó cuan ta ndi oco cumi ra cha vaha chahnu cuan cachicuiñi chiti ra nuu ra cuví Mbee Luhlu cuan. Ta tahan tahan ra cha vaha chahnu cuan nyisó ra arpa, noo cha tari caá guitarra caá. Ta canyisó tucu ra copa xuhun

cuaan tyitu yihí cutu. Ta cutu cuan cuví chi tandihí cha chican tahvi ñu cuenda Nyoo. ⁹Ta cachitá ra noo yaa chaa, ta catyí ra tyehe caa:

Yoho cuví ra tahán chi cha quehun libru ihya, ta cahnyon ndi ucha sellu cha nyaá nu chi.

Vatyi chihun saha ñáyivi. Ta chihin niñun saton chi ndi vatyi coo vaha ndi chihin Nyoo.

Ta cuví ndi ñáyivi ñuu nyihi ta ñuu nahnu nicacahnu ñuhu ñayivi, ñáyivi siin siin sahan cahán, ñáyivi siin siin tata.

¹⁰Chahun ityi chi ndi vatyi cuví ndi rey ta cuví ndi sutu cha cuenda Sutu yo Nyoo.

Ta cucunyaca ñaha ndi chi ñáyivi iyó siqui ñuhu ñayivi, cacatyí ra, chitá ra.

¹¹Yaha cuan ta nanyehi, ta chiñi ndusu cha cahán cuaha xaan ángel, tayucú ra nicachico yuhu tyayu cahnu cuan, ta nu nyicú cumi tahan cha nyitó cuan, ta nu nyicú ra cha vaha chahnu cuan. Ta cuenda millón ángel nyicú cuan, nyehi. ¹²Ta chihin cha ñihi cahan ángel cuan, ta cacatyí ra:

Ra cuví Mbee Luhlu cha chahñi ñáyivi, tahán chi cha cunyaca ñaha ra, ta naquehen cuenda ra cha tyayí.

Tahán chi naquehen cuenda ra cha chiñi tuñi.

Tahán chi cha naquehen cuenda ra tandihí tunyee iñi.

Tahán tucu chi cha cuhva yo gloria chi ra, ta sacahnu yo chi ra.

Ta cahnu xaan ca ra cuví maa
ra, cacatyí ángel cuan.

¹³Ta chiñi tiqui cha cahán tandihi
cha savaha Nyoo, tandihi cha
iyó andivi, ta siqui ñuhu ñayivi,
tandihi cha iyó chichi ñuhú, ta
chichi tyañuhu, tandihi cha savaha
Nyoo catyí chi tyehe caa:

Cahnu xaan ca cuví ra cha nyaá
nu tyayu.

Cahnu xaan ca cuví ra cuví
Mbee Luhlu.

Ta nacuhva yo gloria chi ra.

Ta na cunyaca ñaha ra tandihi
maa tyembu, catyí tandihi
cha savaha Nyoo.

¹⁴Ta ndi cumi cha nyitó cuan
catyí chi:

—iTyicuan caa na cuvi! —catyí
chi.

Ta ndi oco cumi ra cha vaha
chahnu cuan, cachicuiñi chiti ra
ta casacahnú ra chi ra iyó tandihi
tyembu.

Nu chahnya ra Jesucristo ndi ucha tahan sellu

6 Tyicuan ta nyehi nu chahnya
ra cuví Mbee Luhlu cuan sellu
cha xihna ri chichi cha ndi ucha
tahan cuan. Ta chiñi cahán noo cha
nyitó cha cumi tahan cuan, chihin
noo ndusu cha tari caá cha cahán
savi ta catyí chi:

—iÑaha, ta nyehun! —catyí chi
chii.

²Tyicuan ta nanyehi ta nyehi noo
caballu cuichin, ta ra yosó chi ti
cuan ndaha ra noo arco. Ta ñihí ra
noo corona quíhi xiñi ra vatyí saha
ganaa ra, ta cuasaha ganaa ca ra.

³Ta cuhva cha chahnya ra cuví
Mbee Luhlu cuan sellu cu uvi, chiñi

cha catyí cha nyitó cu uvi cuan
tyehe caa:

—iÑaha ta nyehun! —catyí cuan
chii.

⁴Ta quita inga caballu, tyacu
cuaha. Ta ra cha yosó chi ti chicoo
ityi chi ra vatyí tinyaa ra cha taxi
ri iyó ñayivi, tacuhva cahñi ñu
chi tahan ñu. Ta ñihí ra noo mityi
cahnu quindaha ra. ⁵Ta cuhva cha
chahnya ra cuví Mbee Luhlu cuan
sellu cu uñi, ta chiñi cha catyí cha
nyitó cu uñi cuan tyehe caá:

—iÑaha ta nyehun! —catyí cuan
chii.

Ta nanyehi, ta nyehi noo caballu
toon. Ta ra yosó chi ti, yihí ndaha
ra noo ticatya. ⁶Ta chiñi noo ndusu
mahñu cumi tahan cha nyitó cuan,
ta catyí cuan:

—Tari cuhva xuhun yahvi ñu cha
noo quivi, yucuan cuhva yahvi noo
litru nuñi. Tyicuan caa tucu uñi
litru cebada. Ta ma sativun aceteye
ta vinu —catyí ndusu cuan.

⁷Ta cuhva cha chahnya ra cuví
Mbee Luhlu cuan sellu cu cumi,
chiñi cha cahán cha nyitó cucumi
cuan, ta catyí chi, tyehe caa:

—iÑaha ta nyehun! —catyí chi.

⁸Ta nanyehi ta nyehi noo caballu
cuaan. Ta ra yosó chi ti nañí ra
Tuhun Chihi. Ta chata ra vachi
inga ra cha nañí Ra Nyacá Ñaha Nu
Nycícu Ndiyi. Ta cañihí ra tunyee
iñi cha cahñi ra chi cuaha xaan
ñayivi iyó siqui ñuhu ñayivi. Vatyí
chichi cha sava ñayivi iyó siqui
ñuhu ñayivi, cucahñi ra sava ñu.
Ta cucahñi ra chi ñu chihin cha
sanacanda ra cuatyí, ta chihin
tama, ta chihin cuehe, ta chihin
quiti xaan iyó siqui ñuhu ñayivi.

⁹Cuhva cha chahnyā ra cuvī Mbee Luhlu cuan sellu cu ohon, nyehī xiu arta. Yucuan ñohó añima ñu cha chihī cha cuenda tuhun Nyoo tyi sacoto ñu tuhun ra chi ñáyivi. ¹⁰Ta tyehe caa catyí ñu chihin noo ndusu chaa xaan:

—Sutu Mañi yuhu, ra ii cuvún. Ta sacuvún cha catyún. ¿Ama cutachi tuñun chi ñáyivi cha chahñi chi ndi cha catyi tuhun maun? —catyí ñu.

¹¹Tyicuan ta cañihī noo noo ñu cuan sahma cuichin cuihno ñu. Ta catyí ra chi ñu na canyitatu ñu suhva ca quivi, nyacua nya cha caña tahan tandihī ca tahan ñu, ñu sacuví tyiño nuu ra Cristo, ñu cha tahán chi cucúvi tari cuhva chihī maa ñu.

¹²Cuhva cha chahnyā ra cuvī Mbee Luhlu cuan sellu cu iñu, nanyehī ta quichi noo cha taán cahnu. Ta nduñaa ñayivi, tari sahma ñu nyaá tucuihya iñi, toon xaan nduvi. Ta yoo andivi cuan nanduvī tari niñi. ¹³Ta tiño andivi canacoyo ti nya nu ñuhu ñayivi. Tari sanacoyo tu higo chiti yutya tun tatu yahá noo tatyí ñihi. ¹⁴Tari natuví yo noo tutu tyicuan caa cuanaa ri andivi. Ta tandihī yucu ta tandihī ñuhú cha nyicú mahñu tyañuhu nacandā chi ta nasamā chi nu nyaá chi. ¹⁵Ta tandihī rey cha iyó siqui ñuhu ñayivi ñn ri chihin ra nahnu, ta ra tyayii, ta ra cacuví nuu chi sindaro, ta ra iyó xaan fuerza chi, ta tandihī ñu cacuví musu, ta ñu cha ña cuví musu, tandihī ri ñu cuan caquihvi xehe ñu chichi yavi yuu cha iyó yucu nahnu, ta chichi yavi ñuhú. ¹⁶Ta catyí ñu chi yucu cuan ta chi yuu cuan tyehe caa:

—Canacoyo ndo siqui ndi, ta tixehe ndo chi ndi nuu ra nyaá nu tyayu andivi, coto tachi tuñi ra cuví Mbee Luhlu cuan chi ndi.

¹⁷Vatyí cha chaa quivi cahnu cha cutachi tuñi ra chi ndi. ¿Ta yóo cuví cha cuví cunye cuan? —catyí ñu.

Nu ñihī ñu Israel sellu cunyaā tyaan ñu

7 Cha yaha tuhun ihya ta nyehī cumi tahan ángel catayucú ra ndi cumi chiyo nu quichi tatyí siqui ñuhu ñayivi. Ta ña chaha ra yaha tatyí cuan vatyí cava chi siqui ñuhu ñayivi. Ni ña chaha ra cha cava chi nuu tyañuhu, ni siqui yutun catayucú nuu ñuhú. ²Ta nyehe tiqui inga ángel, vachi ra ityi nu cañá ñanyii, ta nyisó ra sellu Nyoo nyitó. Ta ángel cuan canachaa ra chihin cha ñihi ndusu ra chi inga cumi ca ángel cuan, ra cha ca iyó ityi chi vatyí casativi ra nuu ñuhu ñayivi ta nuu tyañuhu. Ta catyí ra chi ra:

³—Ma sativi ñaha ndo nuu ñuhu ñayivi, ni nuu tyañuhu, ta ni nuu yutun cha niri ca cha ta sañaha ca ndi yóo ñu cuví musu Nyoo, vatyí cutyaa ndi noo sellu tyaan ñu —catyí ángel cuan.

⁴Ta chiñi nacatyí ra yoso tahan ñáyivi tyaā ra sellu cuan: cientu uvi xico cumi mil tahan ñu Israel.

⁵Uchi uvi mil ñu tata ra Judá chicunyaā sellu, ta uchi uvi mil ñu tata ra Rubén, inga uchi uvi mil ca ñu cuenda tata ra Gad, ⁶uchi uvi ca mil cuenda tata ra Aser, uchi uvi mil ca cuenda tata ra Neftalí, uchi uvi mil ñu tata cuenda ra Manasés, ⁷ta uchi uvi mil cuenda tata ra

Simeón, uchi uvi mil cuenda tata ra Leví, ta uchi uvi mil cuenda tata ra Isacar, ⁸uchi uvi mil ñu cuenda tata ra Zabulón, ta uchi uvi ca mil ñu cuenda tata ra José, ta uchi uvi mil ca ñu cuenda tata ra Benjamín. Tandihí ñu cuan ta chicunyaa sellu Nyoo chi ñu.

Nu nyehe ra Juan chi ñu ñihnó sahma cuichin

⁹Cha yahah tuhun cuan ta nanyehi ta nyehi cuaha xaan ñáyivi nyicú. Ta yori cuví nacahvi chi ñu, vatyí nyicú ñáyivi tandihí ri ñuu nyihi ta ñuu nahnu iyó siqui ñuhu ñáyivi. Ta nyicú ñáyivi siin siin sahan cahan. Ta nyicú ñáyivi tandihí ri tata. Ta catayucú ñu nuu ra nyaá nu tyayu, ta nuu ra cuví Mbee Luhlu. Ta cañihnó ñu sahma cuichin. Ta cayihí ndaha ñu ndaha ñoo. ¹⁰Ta tandihí ñu chihin cha ñihi ndusu ñu, ta canachaa ñu ta catyí ñu:

—Sutu yo Nyoo, ra nyaá nu tyayu gloria, ta ra cuví Mbee Luhlu, ican ra sacacu chi yo —cacatyí ñu canachaa ñu.

¹¹Ta tandihí ángel catayucú ra nicachico yuhu tyayu cuan, ta nicachico chata ra cha vaha chahnu cuan, ta nicachico chata ndi cumi tahan cha nyitó cuan. Ta cachicuiñi chiti ra chihin nuu ra nya nu ñuhú nuu ra nyaá tyayu cuan. Ta casacahnú ra chi ra. Vatyí Nyoo cuví ra. ¹²Ta cacatyí ra:

Tahán chi tyehe caa chuun: Sacahnú ndi chuun ta chahá ndi gloria chuun vatyí chiñi tuñi xaun.

Nacuhvá xaan ndi tyahvi nyoo chuun.

Ta sacuvahá ndi chuun vatyí iyó xaan tunyee iñi chuun, ta cuaha xaan fuerza iyó chuun, Nyoo Sutu ndi cuví chuun. Ta tyicuan ri na cuví chi tandihí tyembu, catyí ra.

¹³Tyicuan ta noo ra cuví ra cha vaha chahnu cuan ndacaa tuhun ra chii ta catyí ra:
—¿Yóó ñu cañihnó sahma cuichin ihya? ¿Ta nya ityi quichi coyo ñu? —catyí ra.

¹⁴Ta yuhu catyí chi ra:

—Tata, yoho chitón.

Ta catyí ra chii:

—Ican ñu ihya cuví ñu cayahah nu tindoho cahnu. Ta canacatya ñu cuatyí ñu, ta nducuichin sahma ñu chihin niñi ra cuví Mbee Luhlu.

¹⁵Yucuan chaha nyicú ñu ityi nuu tyayu nu nyaá Nyoo. Ta sacuví ñu tyiño nuu ra ndiyaca ta ñiyaca chichi vehe ñuhu ra. Ta ican ra cuví ra nyaá nu tyayu gloria ta cusaha cumi ra chi ñu vatyí cua cunyaa ra chihin ñu. ¹⁶Ta ma nyehe ca ñu tindoho chihin soco, ni chihin cha ityi ñu ndutya. Ta ni ma cahmi ca ñanyii chi ñu. Ni ma sayanga ca cha ihñi chi ñu. ¹⁷Vatyí ra cuví Mbee Luhlu cha nyaá mahñu tyayu cuan cusaha cumi ra chi ñu, tari sahá cumi yo mbee. Ta cunyaca ra chi ñu nu coho ñu ndutya cha chahá cha cuconyito ñu tandihí tyembu. Ta Nyoo cunacuhva ra tandihí ndutya nuu ñu —catyí ra chii.

Nu chahnya ra Jesucristo sellu cu ucha ta quita noo ángel chihin noo cuu xuhun cuaan

8 Cuhva cha chahnya ra cuví Mbee Luhlu sellu cu ucha nu

libru cuan, ndutaxin ri nya andivi tari noo cha sava hora.

²Yaha cuan ta nyehi chi ndi ucha ángel catayucú ra nuu Nyoo. Ta caquehen cuenda ra ucha tahan trompeta. ³Yaha cuan ta quichi inga ángel chihin noo cuu xuhun cuaan cha tuhvá yihí cutu. Ta chicuinanyaá ra ityi nuu arta cuan. Ta quehen cuenda ra cuaha xaan cutu, vatyí cuhva cuenda ra iin ri chihin cha chicán tahvi ñáyivi chi Nyoo. Nuú arta xuhun cuaan cha nyaá ityi nuu tyayu Nyoo, yucuan chaha cuenda ra. ⁴Ta quita ñuhma cutu cuan, nandaá chi nu nyaá Nyoo iin ri chihin cha chicán tahvi ñu cuenda ra. ⁵Tyicuan ta ángel cuan quehen ra cuu cuan. Tyicuan ta sacutu ra chihin titi ñuhu cha quita arta cuan. Ta tuchi ra siqui ñuhu ñayivi. Ta quichaha cahan savi, ta iyo cuví. Ta quihvi tacha, ta quichaha taan.

Nu tiví ángel trompeta

⁶Tyicuan ta ndi ucha ángel cha canyisó ndi ucha trompeta cuan, cha nyatú tuhva ri ra vatyí cativi ra.

⁷Ángel cha xihna ri cuan quichaha tiví ra trompeta ra. Ta quichaha coon savi yuu ta saca niñi chihin chi, ta saca ñuhu cha cayú chihin. Ta cayú cha yatyin cha sava ñuhu ñayivi. Ta cha yatyin cha sava yutun cayú chihin tandihi cuhu cuui.

⁸Ta ángel cu uvi cuan tiví tucu ra trompeta ra. Ta canacava tari noo yucu cha cayú ñuhu mahñu tyañuhu. Ta cha yatyin sava tyañuhu cuan nduvi chi niñi. ⁹Ta cha yatyin sava quiti cha iyó chichi

tyañuhu cuan chihí ti. Ta cha yatyin sava barcu cha iyó cuan, catahvi cuatyí.

¹⁰Ta ángel cu uñi tiví ra trompeta ra. Ta canacava noo tiñoó cahnu andivi, suri cayú ñuhu chi ti tari ñuhu ñiti. Canacava ti siqui cha yatyin ri sava yuvi nahnu ta siqui cha yatyin ri sava ndohyo. ¹¹Ta tiñoó cahnu cuan nañi ti Ajenjo. Ta cha yatyin ri sava ndutya cha iyó, nanduvi chi Ajenjo cha cuví noo veneno cha uva xaan. Ta cuaha xaan ñáyivi chihí cha cuenda ndutya cuan, vatyí ndu uva chi.

¹²Ta ángel cu cumi cuan nativi ra trompeta ra ta cha yatyin sava ñanyii nduñaa, ta cha yatyin sava yoo, ta cha yatyin cha sava tiñoó andivi cuanaa ti. Ta cha cuenda cha nduñaa suhva ñanyii cuhva cuan, nduñaa cumi tahan hora cha noo noo quivi. Ta cha cuenda cha tiví yoo ta tiñoó, yucuan chaha ña cacuví sandichin chi cumi tahan hora cha noo noo ñuu.

¹³Yaha cuan ta nanyehi ta chiñi vatyí noo ángel ndavá ra mahñu andivi. Ta chihin cha ñihi ndusu ra ta catyí ra tyehe caa:

—iNdahvi cuví ñu iyó siqui ñuhu ñayivi vatyí nyaá tiví uñi ca tahan ángel trompeta ra! —catyí ángel cuan.

9 Ta ángel cu ohon cuan nativi ra trompeta ra. Ta nyehi chi noo ra cuan, tari tiñoó andivi caá ra. Ta canacava ra siqui ñuhu ñayivi. Ta quehen cuenda ra cuan ndaha ticu cha cuenda yavi cono cha ñahri maa nu chitahan chi. ²Tyicuan ta nuña ra yavi cuan. Ta cuaha ñuhma nandaá tari maa

ñuhma cha quitá chichi noo horno cahnu. Ta ñuhma cuan chasi chi nuu ñanyii ta nasaca noo chihin tatyí. Ta nduñaa ñayivi. ³Ta mahñu ñuhma cuan caquitá coyo pinchi. Ta candava coyo ti siqui ñuhu ñayivi. Ta chicoo ityi chi ti vatyí tyaa ti chi ñáyivi tari tisuhma cha iyó siqui ñuhu ñayivi. ⁴Quehen ti tuhun vatyí ma satasi iñi ti, ni chi cuhu cha iyó nu ñuhu ñayivi, ta ni noo cuhu cuii, ta ni noo yutun, soco chi ñáyivi cha ñahri sellu Nyoo nyaá tyaan ñu. Chi ñu cuan cutyaa ti. ⁵Soco ñahri ityi iyó chi ti cha cahñi ti chi ñáyivi, soco tacuhva tyaa ri ti chi ñu. Ta coo xico uhvi chi ñu chichi cha ohon yoo. Ta cha uhvi cuan, tari caá xico tisuhma cha tyaá chi ñáyivi tyicuan caá. ⁶Ta quivi cuan ñáyivi cunanducu ñu tuhun chihi. Soco ma nañihi ca ñu. Ta vasi cuñí ñu cúvi ñu, soco tuhun chihi cucono ri chi chi ñu vatyí ma cúvi ñu.

⁷Tari caá caballo nahnu cha cachicá cuatyí, tyicuan caá pinchi cuan. Ta xiñi ti yihí tari caá noo corona xuhun cuaan. Ta tari caá nuu rayii, caá nuu ti. ⁸Ta xixi xiñi ti tari caá xixi xiñi ñusihí caá. Ta tari caá noho ndicaha caá noho ti. ⁹Ta soo ti tari caa, tyicuan caa. Ta ñihi xaan cachan ndichin ti. Tari cachan cha cuaha xaan carreta caballo cuhva cha cachinó ti nu iyó cuatyí. ¹⁰Ta tari caá suhma tisuhma caá suhma ti, vatyí yihí iñu. Ta chihin cuan cuví tyaá ti chi ñáyivi chichi cha ohon yoo. ¹¹Ta pinchi cuan iyó noo ra cuví nuu chi ti. Ta ican cuví noo ángel cha nyacá ñaha yavi cahnu ta cono cha ñahri

nu chitahan. Ta cha chihin sahan hebreo nañí ra Abadón. Ta chihin sahan griego nañí ra Apolión, ta cuñí chi catyí: Ra Sanaa.

¹²Yaha noo tindoho cuan, soco cumañi uvi ca.

¹³Ta ángel cu iñu cuan nativi ra trompeta ra. Ta chiñi noo ndusu cha quitá chichi ndi cumi ndiqui tutun arta xuhun cuaan cha nyaá nuu Nyoo. ¹⁴Ta ndusu cuan catyí chi ángel cu iñu cha nyisó trompeta cuan, tyehe caa:

—Ndachi chi ndi cumi ángel cha canuhñi yatyin yuhu yuvi cahnu Eufrates —catyí ndusu cuan.

¹⁵Tyicuan ta ndachi ndi cumi ángel cuan, vatyí cha nyatu tuhva xaan ra maa maa cuhva cuan maa maa quivi cuan, maa maa yoo cuan, maa maa cuiya cuan, vatyí cahñi ra chi cha yatyin cha sava ñáyivi iyó siqui ñuhu ñayivi. ¹⁶Ta chiñi yoso tahan sindaro chihin caballo ra, ta quitá uvi cientu millón tahan ra.

¹⁷Ta tyicuan caa nyehi caballo cuan chihin visión, cha sanyehé Nyoo chii. Ta pechu ra cayosó chi ti cuan, yihí noo caa tyacu cuaha, tyacu azu ta tyacu cuaan. Ta tari caá xiñi ndicaha caá xiñi caballo ra. Ta chichi yuhu ti quitá ñuhu ta ñuhma ta azufre. ¹⁸Ta cha yatyin sava ñáyivi iyó siqui ñuhu ñayivi cachihí chihin uñi tahan cha caquitá yuhu caballo cuan; ñuhu ta ñuhma ta azufre. ¹⁹Vatyí tunyee iñi cha iyó chi ti, chichi yuhu ti ta suhma ti nyaá. Vatyí tari caá coo, caá suhma ti. Tari noo xiñi coo tyicuan caa nuu suhma ti. Ta chihin cuan sañicuehé ti chi ñáyivi.

²⁰Soco tandihí ca ñu cha candoo, cha ña cachihí chihin cuehe cuan,

ña sacucuitā ñu cha sacuví ñu cha ña vaha. Ta ni ña sacucuitā ñu cha sacahnú ñu chi tatyí ña vaha ta chi xitohyo. Vatyí cuví cuan noo xuhun cuaan, xuhun cuichin, bronce, yuu, yutun. Cha ña cuví nyehe, ni ña chiñí ta ni ña cuví caca cuví cuan. ²¹Ni ña casandihí ñu cha chahñí ñu, ta cha sataśí ñu. Ta ña sandihí ñu cha iyó ñu chihin rayíi ta chihin ñusihi ta ñima yíi ñu cuví, ta ñima ñasihi ra cuví. Ta ña sandihí ñu cha suhú ñu.

Ángel cha nyisó libru luhlu

10 Tyicuan ta nyehí inga ángel cha iyó xaan tunyee iñi chii, cha vachi noó ityi andiví mahñu noo vico. Ta noo coo yahnyi nyaá xiñi ra. Ta xiño xaan nuu ra tari ñanyii. Ta tari cha cayú ñuhu chaha ra, tyicuan caá. ²Ta yihí ndaha ra noo libru luhlu cha tanuña nuu. Ta chinanyaā ra chaha chiyo vaha ra nu tyañuhu. Ta chaha chiyo satyin ra chinanyaā ra siqui ñuhu ñayiví. ³Tyicuan ta ñihi xaan cana chaa ra, tari ndusu ndicaha cha nduxaan ti. Ta cuhva cha canachaā ra, chiñí ucha tahan ndusu cha siin siin caa tari cha cahán savi, tyicuan caa ndusu ra. ⁴Ta cha yahā cha chiñi cha cahān ndí ucha ndusu cuan, tyicuan ta cuatyai nuu tutu. Soco chiñí noo ndusu ityi andiví, ta catyí chi chii tyehe caa:

—Cocumi xehun tuhun cha chiñun cahan ndí ucha ndusu cuan. Ta ma tyaun nuu tutu —catyí ndusu cuan chii.

⁵Tyicuan ta ángel cha nyehí cha chañí nu tyañuhu ta siqui ñuhu ñayiví, nacoñehē ra ndaha chiyo

vaha ra ityi andiví. ⁶Ta ángel cuan tyanahā ra vatyí cahan ra noo cha ndicha cuenda Nyoo, ra nyitó tyicuan ri maa, ra cha savahā andiví ta ñuhu ñayiví ta tyañuhu ta tandihí cha iyó nuu chi. Ta catyí ra:

—Ñahri ca cha cucuee. ⁷Vatyí cuhva cha cuquichaha tiví ángel cu ucha cuan trompeta ra, yucuan cuhva cuchino cava tuhun xehe cha yihí iñi Nyoo tyi sacuvi ra, tari cuhva sacotō ra chi ra casacuví tyiño nuu ra, ra cacuví profeta cuenda ra —catyí ángel cuan.

⁸Ta ndusu cha chiñí yuhu, cha quita ityi andiví, cahan tucu chi chihin inga chaha, ta catyí chi chii tyehe caa:

—Cuāhan, ta quehun libru luhlu cha tanuña nuu, cha yihí ndaha ángel cha chañí nu tyañuhu ta nu ñuhu ñayiví —catyí chi.

⁹Tyicuan ta chahin nu nyaá ángel cuan ta chiquen libru luhlu cuan nacuhva ra chii, ta catyí ra chii:

—Quehen, ta cāchun, vixi xaan tari tyañuñu. Soco chichun cundu uva chi —catyí ra chii.

¹⁰Tyicuan ta quehin libru luhlu cha yihí ndaha ángel cuan, ta chachi. Vixi xaan tari tyañuñu. Soco cha yahā cha chachi, uva xaan nduvi chi chichi. ¹¹Tyicuan ta catyí ra chii:

—Cuñí chi cha cunacatyun inga chaha tuhun cha cahán Nyoo siqui ñáyiví cuaha xaan ñuu nyihi ta ñuu nahnu, ta siqui ñáyiví siin siin sahan cahan, ta siqui ra cacuví rey —catyí ra chii.

Uvi tahan ra cacuví cha ndaa

11 Tyicuan ta cachahā ra noo ndoo cha tari caá noo

yutun cha tyicuhvá chi. Ta cacatyí ra chii tyehe caa:

—Ndúcuuta ta tyicuhvon vehe ñuhu Nyoo ta arta ra, ta ñacahvun yoso tahan ñu tuhvá sacahnú chi Nyoo yucuan. ²Soco ma tyicuhvon nuquehe cha nyaá ityi chata vehe ñuhu cuan. Vatyí cha cuenda ñu inga ñuu cuví. Ta ican ñu cuan cucuaca chaha ñu ñuu ii cuan chichi cha uñi cuiya sisava. ³Ta yuhu cutachi uvi testigu cucahan ra cha cuende cha ni ri ca cha chichi noo mil uvi cientu uñi xico quívi. Ta cacuihno ra sahma tucuihya iñi.

⁴Ta ican ninduvi testigu cuan cuví uvi tahan yutun olivo ta uvi tahan cañileru cha tayucú nuu Sutu Mañi yo, ra nyacá ñaha síqui ñuhu ñayivi. ⁵Tatu yóo ñu cuñí satasi iñi chi ninduvi testigu cuan, cuquita ñuhú yuhu ninduvi ra, ta cahmi chi tandihi ñu xaan iñi chi ra. Ta tyicuan caa cucúvi ñu cuñí satasi iñi chi ra. ⁶Testigu cuan iyó ityi chi ra cha cacasi ra nu ma coon savi cha niri ca cha cachahá cuenda ra tuhun cahán Nyoo chi ñáyivi. Ta iyó tucu ityi chi ra cha casananduvi ra niñi chi ndutya. Ta iyó tucu ityi chi ra cha casanyehe ra tindoho chi ñu iyó síqui ñuhu ñayivi chihin tandihi ri nuu cuehe, yoso tahan chaha cha cacuñí maa ra. ⁷Soco cuhva cha cua ndihí cuhva cuenda ra tuhun Nyoo chi ñáyivi, cuquita noo quití xaan yavi cono cuan, ta cucañi tahan tí chihin ninduvi testigu cuan. Ta cucuvi chasaha tí chi ra. Ta cucañi tí chi ra. ⁸Ta coño ñuhu ra cundoo maa cava calle ñuu nu chihí Sutu Mañi yo nu cruzi. Ta tari Sodoma ta Egipto

nanduvi ñuu cuan, (cha cuenda cha ña vaha cha sacuvi ñáyivi ñuu cuan). ⁹Ta chichi cha uñi quívi sisava, cunyehe tandihi ñáyivi coño ñuhu ra, ñáyivi tandihi ñuu nyihi, ñáyivi tandihi ri tata, ta ñáyivi siin siin sahan cahán, ta ñáyivi ndihi ri ñuu nahnu, cunyehe ñu coño ñuhu ra. Ta ma cuhva ñu cha quíhi coño ñuhu ra chichi ñuhú. ¹⁰Ta ñu cha iyó síqui ñuhu ñayivi cu cusí xaan cuñí ñu cha cuenda cha cachihí ra cuan. Ta nyacua cutachi ñu regalo chi tahan ñu cha sií cuñí ñu, vatyí cachihí ninduvi rayíi cha cachahá cuenda tuhun cahán Nyoo chi ñu. Vatyí chahá xaan ra tindoho chi ñu cha cuhva cha cuñí maa ñu. ¹¹Soco cha yahá cha uñi quívi sisava, Nyoo sanandoto ra chi ra, ta candúcuuta tucu ra inga chaha. Ta tandihi ñu nyehe canandoto ra, canayuhvi xaan ñu. ¹²Tyicuan ta ninduvi testigu cuan cachiñi ra noo ndusu ñihi xaan ityi andivi. Ta catyí chi chi ra tyehe caa:

—Ndáa ndo ityi síqui ihya —catyí ndusu cuan chi ra.

Ta candaq ra ityi andivi chichi noo vico. Ta canyehe ñu xaan iñi chi ra nu canandaá ra. ¹³Ta cuhva cuan quichí noo cha taan cahnu. Ta chichi ñuu cuan canacoyo cuaha xaan vehe. Ta chichi cha uchi uchi tahan vehe, canacoyo noo noo. Ta cha tandihi chichi ñuu cuan chihí ucha mil ñáyivi cha cuenda cha taan cuan. Ta ñáyivi ña chihí, casacahnú ñu chi Nyoo, ra nyaá andivi, cha cuenda cha yuhvi ñu.

¹⁴Yahá tindoho cu uvi cuan, soco numi ri cuquichi tindoho cu uñi.

Nu tiví ángel trompeta cu ucha

¹⁵Ta ángel cu ucha nativí ra trompeta ra. Ta canatyacu ndusu ñihi xaan ityi andiví, ta catyí chi tyehe caa:

Tandíhi nu nyacá ñaha rey siqui ñuhu ñayiví ihya, cha yahá nanduvi chi Sutu yo Nyoo ta chi ra Cristo.

Ta maa ra cucunyaca ñaha tyicuan ri maa, catyí ndusu cuan.

¹⁶Tyicuan ta ndí oco cumi ra cha vaha chahnu, ra canyicú nuu tyayu nu nyaá Nyoo, cachicuñí chiti ra chihin nuu ra nya nu ñuhu. Ta casacahnú ra chi Nyoo. ¹⁷Ta cacatyí ra:

Nacuhvá ndi tyahvi nyoo chuun, Sutu Mañi nyuhu.

Nyoo ra iyó tandíhi tunyee iñi chii cuvún.

Yoho iyón vityin, ta iyón nu quichaha tandíhi ta nya cha cuquichun.

Vatyí cha naqueheñ cuendon tunyee iñun.

Ta cha quichahun nyaca ñahun vityin.

¹⁸Ta ñáyiví tandíhi ñuu nahnu cuxaān ñu.

Soco cha chaā quiví cha tachi tuñun chi ñu.

Ta cha chaā quiví cha cucutuñi chi ñu ndiyí.

Ta cucuhvon cha vaha cha tahán chi chi ñu sacuví tyiño nuun, ñu chahá cuenda tuhun cahún,

ñu cha nacuhvā cuenda añima chí maun, ta sacahnú ñu sívun.

Vasi cahnu ñu cuví ñu ta vasi ndahvi ñu.

Ta chaā cuhva cha sanaun chi ñu sativí chi ñáyiví siqui ñuhu ñayiví, cacatyí ra.

¹⁹Tyicuan ta nuña yuvehe ñuhu Nyoo cha nyaá andiví, ta chichi vehe ñuhu natuví caja cuenda cha natyihí tahan ra tuhun chihin yo. Ta quihví tacha. Ta vaa ri maa cuví, ta cahān savi. Ta chiyó noo cha taan. Ta ñihi xaan coon savi yuu.

Nu chicān nyicon noo coo cahnu chi noo ñaha síhi

12 Tyicuan ta tuví noo seña cahnu andiví. Vatyí quita noo ñaha síhi ta siquí noo ña ñanyii tari cha ñihnó ña vestido. Ta chañí ña siquí yoo. Ta yihí noo corona cha uchi uvi tiño andiví xiñi ña. ²Ta ñaha síhi ihya ñohó sehe ña. Ta chacú cha vavaha ña chihin cha uhvi cha cacú sehe ña, vatyí nyehé xaan ña tindoho cha cua cacu sehe ña. ³Tyicuan ta quita nonga seña ityi andiví. Ta nyehí noo coo cuaha cahnu. Ta nyaá ucha xiñi ti, ta uchi ndíqui ti. Ta tahan tahan xiñi ti yihí noo corona. ⁴Ta chihin suhma ti sanacoyó ti cha yatyin cha sava tiño andiví siquí ñuhu ñayiví. Ican coo ihya chicuñí ti nuu ñaha cha cua cacu sehe cuan, vatyí ta cha cacu ri cue ta cachi ti chí cue. ⁵Ta ñaha cuan sacacú ña noo rayii. Ta ican ra cuacunyaca ñaha tandíhi ñáyiví iyó siquí ñuhu ñayiví. Ñihi xaan cua cunyaca ñaha ra tari cha chihin noo yutun caa vee. Ta cha yahá cacú ra, naxita Nyoo chí ra nu nyaá ra nu tyayu ra. ⁶Ta ñaha cuan chinó ña cuahan ña noo ñuhú ityi,

nu sanduvahā Nyoo noo nu coo ña, vatyi yucuan cucuhva ra cha cachi ña cha ñi ri ca cha noo mil uvi cientu uñi xico quivi.

⁷Yahā cuan ta chiyo noo cuatyi nya andivi, nu cañi tahan ángel cahnu Miguel ta tandihi ángel cuenda ra chihin coo cahnu cuan. Ta coo cuan ta tandihi tatyí ña vaha cuenda ti, cacañi tahan chihin ra Miguel. ⁸Soco ña saha ganaa ti cha cañi tahan ti. Ta ña ñihí ca ti nu ndoo ti nya andivi chihin tatyí ña vaha cha candihi chihin ti. ⁹Tyicuan ta tavā ñehe Nyoo chi ti, cuví ti Coo Chahnu, cha nañí cuihna ra cuví nuu, ra cha sandaví ñaha chi tandihi ñáyivi iyó síqui ñuhu ñayivi. Maa ra ta tatyí ña vaha cuenda ra cacanacoyo ra nya nu ñuhu ñayivi.

¹⁰Tyicuan ta chiñi noo ndusu ñihi nya andivi. Catyí chi tyehe caa:

—Cha chaq̄ nu cacū añima yo vityin. Cha saha ganaa tunyee iñi Nyoo. Cha nyacá ñaha Nyoo yo vityin chihin ra Cristo Sehe ra. Vatyi cha tavā ñehe ra chi ra cha tyaq̄ xaan cuatyí síqui ra yañi yo ndiyaca ta ñiyaca nuu Nyoo. ¹¹Ta ra yañi yo cacuví chasaha ra chi ra chihin ñiñi ra cuví Mbee Luhlu, ta chihin tuhun Nyoo cha cacahan ra tuhun chihin ñáyivi. Vatyi ña yuhvi ca ra cha cucúvi ra. ¹²Yucuan chaha cusii cuñi nyoho cha iyó ndo andivi. Soco indahvi nyoho ñu iyó síqui ñuhu ñayivi ta nu tyañuhu! Vatyi cuihna canacavā ra nya andivi ta nyacua nya síqui ñuhu ñayivi nu nyicú ndo. Ta xaan xaan ra vatyi chitó ra vatyi suhva ri ca quivi ra nyaá.

¹³Ta cha nyehe coo cahnu cuan vatyi nacavā ti nu ñuhu ñayivi, chica nyicon ti chi ñaha cha sacacu sehe cuan. ¹⁴Soco ñaha cuan ñihí ña uvi tahan ndichin nahnu tasu, tacuhva cuví ndava ña ta cono ña chi coo cuan nyacua nya ñuhu ityi cuan. Ta yucuan cuví nu cuñihi ña cha cachi ña chichi cha uñi cuiya sisava. ¹⁵Ta coo cuan tuchi ti ndutya chihin yuhu ti, vatyi cono noo yuvi cahnu, vatyi satyañi chi ñaha cuan. ¹⁶Soco ñuhu ñayivi tyinyee chi ña, vatyi ndata chi ta quihvi yuvi cahnu cha tuchi coo cahnu cuan chihin yuhu ti. ¹⁷Ta cha cuenda cha ña cuví chasaha ti chi ña, cuahan ti cua cañi tahan ti chihin ñáyivi vachi tata ña, ñu cha quichahá tuhun cahán Nyoo, ñu nyicón cha ndicha cha cahán ra Jesucristo chihin cha ñi iñi ñu.

Nu nyehe ra Juan uvi quití quiñi caa

13 Chicuinanyaj nu ñiti yuhu tyañuhu cuan. Ta nyehi quitá noo quití quiñi xaan caa nuu tyañuhu. Ta nyaá ucha xiñi ti, ta uchi ndiqui ti. Ta tahan tahan ndiqui ti yihí noo corona. Ta xiñi ti nyaá noo tuhun cha cahán ña vaha síqui Nyoo. ²Quití quiñi caa ihya caá ti tari caá noo cuiñi. Ta tari caá chaha yihí caá chaha ti. Ta yuhu ti tari caá yuhu ndicaha caá. Ta coo cahnu cuan chahā ti ityi chi quití quiñi caa cha cunyaa ti nu tyayu ti. Ta chahā ti ityi chi ti cha cunyaca ñaha ti chi ñáyivi. ³Ta noo xiñi quití quiñi caa cuan tari maa cha nyaá noo nu cahvi cahnu. Soco nu cahvi cuan nduvahā. Ta iyo xaan cuiñi tandihi ñáyivi iyó síqui ñuhu

ñayiv̄i. Ta nanyicón ñu chi quit̄i quiñi caa cuan. ⁴Ta sacahnú tucu ñu chi coo cahnu cuan, vatyí chaha ti ityi chi quit̄i quiñi caa cuan. Ta sacahnú tucu ñu chi quit̄i quiñi caa cuan, ta catyí ñu:

—¿Yóó cha cuví chi tari cuví chi quit̄i quiñi caa ihya? ¿Ta yóó cha cuví cañi tahan chihin ti? —catyí ñu.

⁵Ta ñih̄i tucu quit̄i quiñi caa cuan ityi vatyí cahan ña vaha ti ta cahan quiñi caa ti siqui Nyoo. Ta cua cunyaca ñaha ti chichi cha uvi xico uvi yoo. ⁶Ta tyicuan caa sacuv̄i ti. Cah̄an ti siqui Nyoo. Ta cah̄an ña vaha ti siqui nu nyaá Nyoo. Ta cah̄an ti chi ñu nyicú and̄iv̄i. ⁷Ta chicoo tucu ityi chi ti cha sacoo ti cuatyí siqui ñu cuenda Nyoo nyacua nya cuv̄i chasaha ti chi ñu. Ta chicoo ityi chi ti siqui ñáyiv̄i nd̄ih̄i ri tata, ñáyiv̄i siñ siñ sahan cahan, ñáyiv̄i tand̄ih̄i ri ñuu nyih̄i, tand̄ih̄i ri ñuu nahnu, ⁸tand̄ih̄i ñu cha ma ñih̄i ñayiv̄i chaa coo chihin ra cuví Mbee Luhlu, ra cha chih̄i. Ma ñih̄i ñu vatyí nyata ni cumañi chin̄o ñuhu ñayiv̄i ta ñahri siv̄i ñu nyaá nu libru ra. Tand̄ih̄i ñu cuan cusacahnu ñu chi quit̄i quiñi caa cuan. ⁹Ta ñu cutuñí iñi, na quichaha ñu tuhun ihya: ¹⁰Ñu cunyaca vehe caa chi inga ñu, suri cahun tucu maa ñu. Ta ñu cha cachahñí chihin cha xaan, suri chihin cuan cucúvi tucu maa ñu. Yucuan chaha cuñí xaan chi cha cunyeec xaan iñi ñu cuenda Nyoo. Ta cuñí chi cha chino iñi ñu chi ra.

¹¹Yah̄a cuan ta nyeh̄i inga quit̄i quiñi caa. Quit̄a ti chichi ñuhú. Quit̄i ihya nyaá uvi nd̄iqui ti cha tari caá nd̄iqui

mbee luhlu. Soco tari cahán noo coo xaan vavaha cahán ti. ¹²Ta nyacá ñaha ti tari nyacá ñaha quit̄i quiñi caa cha xihna ri cuan. Suri chihin nuu quit̄i cha xihna ri cuan nyacá ñaha ti. Ta tyiyuhu ti chi ñuhu ñayiv̄i ta ñu iyó siqui na sacahnu ñu chi quit̄i quiñi caa cha xihna ri cuan, quit̄i cha nduvah̄a nu cahvi cahnu cha chinyaa chi ti. ¹³Ta cuaha xaan milagru sacuv̄i ti. Nyacua cuví sanacoyo ti ñuh̄u cayú ityi and̄iv̄i chihin nuu ñáyiv̄i. ¹⁴Ta sandav̄i ñaha ti chi ñáyiv̄i iyó siqui ñuhu ñayiv̄i chihin seña cha cuví sacuv̄i ti chihin nuu quit̄i quiñi caa cha xihna ri cuan. Ta tach̄i ti nachino noo xiñahñu quit̄i quiñi caa cha tahnya cahvi chihin mityi, soco ña chih̄i ti. ¹⁵Ta quit̄i quiñi caa cu uvi cuan chicoo ityi chi ti cha cuhva ti cha conyito xiñahñu quit̄i quiñi caa cha xihna ri cuan, vatyí xiñahñu cuan cuví cahan. Ta tach̄i xiñahñu cuan nacúvi tand̄ih̄i ñáyiv̄i ña cuñí sacahnu chi chi. ¹⁶Ta siñ ri catyí ti vatyí na cunyaa noo tuñi chi tand̄ih̄i ñáyiv̄i, tand̄ih̄i ñu nyih̄i, ñu chahnu, ñu tyaȳi, ñu ndahvi, ñu yori chitoho, ta ñu iyó chitoho. Ta cucunyaa tuñi cuan ndaha chiyo vaha ñu o tyaan ñu. ¹⁷Ta yori maa cuví sata ta xico tatu ñahri tuñi cuan nyaá chi ñu. O tatu ñahri siv̄i ti, o número siv̄i ti nyaá chi ñu. ¹⁸Tuhun ihya cuñí xaan chi cha chiñi tuñi. Ñu cutuñí iñi, na saha ñu cuenda número quit̄i quiñi caa cuan. Vatyí número noo raȳi cuví. Ta número ra cuan ican cuví iñu cientu uñi xico iñu.

Nu sacahnú cientu uvi xico cumi mil ñáyiv̄i chi Nyoo chihin cha chitá ñu

14 Yah̄a cuan ta nyeh̄i chi ra cuví Mbee Luhlu, nanyaá ra

nu yucu Si6n. Ta chihin ra tayucú cientu uvi xico cumi mil ñáyiví cha nyaá sivi ra tyaan ta sivi Sutu ra. ²Tyicuan ta chiñí noo cha cayu cha quichi ityi andiví, tari cayu cuaha yuvi nahnu. Ta tari cahán savi cha ñihi xaan, o tari noo ndusu cha cuaha xaan ra casacuacú arpa. ³Ta cachitá ñu noo yaa chaa nuu tyayu Nyoo, ta nuu ndi cumi cha nyit6 cuan, ta nuu tandihí ra cha vaha chahnu cuan. Ta yori cuví cutuhva yaa cuan, iin ri maa cientu uvi xico cumi mil ñu cha cacu añima siqui ñuhu ñayiví. ⁴Ican ñu ihya cuví ñu cha ña chicoo cuatyí ñu chihin inga rayíi ta ni ri rayíi chihin inga ñusihí, vatyí ii ndoo ñu, ta nyic6n ñu chi ra cuví Mbee Luhlu tandihí ri ityi nu cuahan ra. Cacu añima ñu ta cuví ñu ñu xihna ca chahá cuenda ñu chi ñu chi Nyoo ta chi ra cuví Mbee Luhlu. ⁵Yori cuví catyí vatyí cuendu ñu, vatyí ni noo cuendu ña tuhvá ñu cahan. Yucuan chaha ñahri cuatyí ñu nuu Nyoo.

Tuhun cha sacoto uñi tahan ángel

⁶Tyicuan ta nyehí inga ángel cuahan ndava ra andiví. Ta nyisó ra tuhun Nyoo cha ma ndihí ca maa, ta ican tuhun ihya cuví cha sacacú ra Cristo añima yo, Vatyí cusacoto ra tuhun ihya chi ñáyiví iyó siqui ñuhu ñayiví, ñáyiví ndihí ri ñuu nahnu, ta ndihí ri ñuu nyihi, ta ñáyiví ndihí ri tata, ta ñáyiví siin siin sahan cahan. ⁷Ta ñihi xaan cahán ra ta catyí ra:

—Na yuhvi ndo chi Nyoo, ta sacahnu ndo chi ra. Vatyí cha chaa cuhva cha cua cutuñi chi ñáyiví. Sacahnu ndo chi ra savahá andiví

ta ñuhu ñayiví, ta tyañuhu ta ndohyo ndutya.

⁸Tyicuan ta cuahan inga ángel cuan chata ra, ta catyí ra:

—Cha canacava ñuu Babilonia cahnu vityin, cha taní chi. Vatyí ñu iyó ñuu cuan sañaha ñu chi inga ñáyiví iyó siqui ñuhu ñayiví cha quiñi caa tari sacuví maa ñu. Tari quiví cha sacuiñí ñu chi ñu chihin vinu ña vaha cuví cuan.

⁹Ta nacahan ángel cu uñi chihin cha ñihi ndusu ra ta catyí ra:

—Tatu nya noo ñu sacahnú ñu chi quití quiñi caa cuan ta chi xiñahñu ti, o chahá ñu chi ñu cha cunyaa tuñi ti tyaan ñu, o ndaha ñu, ¹⁰cunyehe xaan ñu tindoho vatyí cutyíhi Nyoo chi ñu nu ñuhu, ta nu azufre tari cha cusacoho Nyoo noo vinu xaan chi ñu. Ta chihin nuu ángel ta chihin nuu ra cuví Mbee Luhlu cucuvi cuan. ¹¹Ta ñuhma cha quitá nu nyehé ñu tindoho cuan tyicuan ri maa cuquita chi. Ta ma nyitatu maa ñu ndiyaca ta ñiyaca nu cohon ñu yucuan, vatyí sacahnu ñu chi quití quiñi caa cuan ta chi xiñahñu ti, o chahá ñu cha cunyaa tuñi sivi ti chi ñu. ¹²Yucuan chaha ñu yihí cuenda Nyoo, ñu quichahá tuhun cahán ra, niñi ñu chinó iñi ñu chi ra Jesús ta cuñí chi cha cunyehe xaan iñi ñu cha nyehé ñu tindoho sacuvi inga ñáyiví.

¹³Tyicuan ta chiñí noo ndusu cha quichí ityi andiví, ta catyí chi chii tyehe caa:

—Tyaa tuhun ihya: “Vityin ta ityi nuu ca, sii xaan cucuvi chi ñu chihí ta chinó iñi ñu chi Sutu Mañi yo.” Ndicha, catyí Tatyí Ii Nyoo vatyí cunyitatu ñu chihin tyiño sahá ñu.

Ta iin ri cuhun cha vaha cha sacuvi ñu chihin ñu.

Nu cutachi tuñi Nyoo chi ñáyivi

¹⁴Tyicuan ta nanyehi ta nyehi noo vico cuichin. Ta siqui vico cuan nyaá noo rayii cha ndicha cuii maa cha quichi nya gloria. Ta yihí noo corona xuhun cuaan xiñi ra. Ta yihí ndaha ra noo mityi cutya ta xaan.

¹⁵Ta quita nonga ángel chichi vehe ñuhu ta chaa canachaá ra chi ra nyaá siqui vico cuan. Ta catyí ra:

—Vityin saha tyiñon chihin mityun, ta na satacon cosecha cha iyó siqui ñuhu ñáyivi. Vatyí cha chaa cuhva, ta cha iyó siqui ñuhu ñáyivi cha chityí chi —catyí ra.

¹⁶Tyicuan ta ra cha nyaá siqui vico cuan sayaha ra mityi ra siqui ñuhu ñáyivi, ta nasatacá ra cha iyó nuu chi.

¹⁷Tyicuan ta inga tucu ángel quita chichi vehe ñuhu cha nyaá andivi. Ta nyisó tucu maa ra noo mityi cutya cha xaan vavaha. ¹⁸Ta nu nyaá arta quita tucu nonga ángel cha iyó ityi chi cha cunyaca ñaha chi ñuhu cha cayú. Ta canachaá ra ta caná ra chi ra cha nyisó mityi cutya cha xaan cuan. Ta catyí ra chi ra:

—Saha tyiñon chihin mityi xaan cha nyisón chiña, ta na satacon vatu tichaha ndivi cha iyó siqui ñuhu ñáyivi, vatyí cha chityí —catyí ra.

¹⁹Ta ángel cuan sayaha ra mityi ra siqui ñuhu ñáyivi ta chahnya ra tichaha ndivi cha iyó siqui ñuhu ñáyivi. Ta tyihí ra noo nu tyihi ra vatyí cucuhñi ra ta quita ndutya chi. Ta cha tyehe caa cuñi chi catyí cha

cutachi tuñi Nyoo chi ñáyivi. ²⁰Ityi chata ñuu cachahñi ra tichaha ndivi cuan, ta cuñi chi catyí vatyí cachihí cuaha xaan ñáyivi, ta nu cuví cuan, cama xaan cama xaan niñi ñu chati. Ta chaa chi nya nu sucun nu nyaá frenu yuhu caballu ta tari cuhva noo uñi cientu kilómetro chinó niñi cuan.

Nu quita ángel chihin ucha ca tahan tindoho cha cunyehe ñáyivi nu ndihi tuhun

15 Nyehi nonga seña cahnu andivi, ta yuhvi xain cuví, vatyí nyehi ucha tahan ángel chihin ndi ucha tindoho. Chihin ihya cuví nu ndihi tindoho vatyí cundihi cha cuxaan Nyoo chihin ñáyivi cha ña quichahá ñu tuhun cahán ra.

²Ta nyehé tiqui noo cha tari caa tyañuhu, xiño tari caá ino, nasacá chi chihin ñuhu cha cayú. Ta ñu cha yaha cuví chasaha chi quiti quiñi caa cuan ta chi xiñahñu ti, ñu cuví chasaha cha ma cunyaa número sivi ti cuan chi ñu, tandihi ñu tayucú ñu yuhu tyañuhu cha xiño cuan. Ta ndahá ñu arpa, cha chahá Nyoo chi ñu. ³Ta chita ñu yaa ra Moisés, ra sacuvi tyiño nuu Nyoo, ta yaa ra cuví Mbee Luhlu. Ta tyehe caa catyí ñu:

Cahnu ta iyo xaan caá tandihi maa cha sacuvín.

Nyoo, Sutu ndi, iyó tandihi tunyee iñi chuun.

Ndoo xaan ta ndicha xaan ityun. Yoho Rey cuvún cuenda tandihi ñáyivi iyó siqui ñuhu ñáyivi.

⁴¿Yóo cha ma yuhvi chuun, yoho Sutu Mañi nyuhu?

¿Yóo cha ma sacahnu chuun?

Vatyi noo tuhun ri maun cuví ra ii.

Ta cuquichi coyo ñáyivi tandíhi ñuu, ta cusacahnu ñu chuun.

Vatyi cha nyehe ñu cha vaha cha sacuvún, catyí ñu chitá cuan.

⁵Cha yaha tuhun ihya ta nanyehi nuña yuvehe ñuhu nya andivi nu cumi vaha ñu tabla cha nyaá ley. ⁶Ta chichi vehe ñuhu cuan quitá coyo ndi ucha ángel cha canyisó ndi ucha tindoho cuan. Ta cañihno ra sahma finu, cuichin ta xiño. Ta cayihí ra sincho xuhun cuaan ta nya pechu ra chitahan. ⁷Tyicuan ta noo cha nyitó cuan, chaha cuan noo noo copa xuhun cuaan chi ndi ucha tahan ángel cuan. Ta chichi copa cuan tyitu maa yihí cha xaan Nyoo cha cutachi tuñi ra chi ñáyivi. Ta ican ra iyó ra tyicuan ri maa. ⁸Ta chichi vehe ñuhu cuan chitú maa chihin ñuhma cha cuenda cha cahnu xaan cuví Nyoo ta cha cuenda tunyee iñi iyó chi ra. Ta yori maa cuví quihvi chichi vehe ñuhu cuan cha niri ca cha cumañi ndihi ndi ucha tindoho cha nyisó ndi ucha tahan ángel cuan.

Copa cha yihí tindoho cha cua saquichi ndi ucha tahan ángel cuan

16 Tyicuan ta chiñi noo ndusu ñihi cha quitá vehe ñuhu nu nyaá Nyoo. Ta catyí chi chi ndi ucha ángel cuan:

—Cuhān ndo cua coyo ndo cha ñohó chichi copa chiña siqui ñáyivi iyó siqui ñuhu ñáyivi, vatyi Nyoo cutachi tuñi ra chi ñu —catyí ndusu cuan.

²Ángel cha xihna ri cuan chahan ra ta coyo ra cha ñohó chichi copa

cuan siqui ñáyivi cha nyaá tuñi quití quiñi caa cuan chi, ñu cha sacahnú xiñahñu ti. Ta quitá noo nu cahvi xaan chi ñu, ta uhvi xaan.

³Ta ángel cu uvi cuan coyo ra cha yihí chichi copa ra nu tyañuhu. Ta ndutya tyañuhu cuan nanduvi ñiñi tari ñiñi noo ndiyi, ta tandíhi cha nyitó chichi tyañuhu cuan cachihí.

⁴Ta ángel cu uñi cuan coyo ra cha yihí chichi copa ra siqui yuvi nahnu ta siqui ndohyo ndutya ta cananduvi chi ñiñi. ⁵Tyicuan ta chiñi cha cahán ángel cuenda ndutya tyehe caa:

—Sutu Mañi yuhu, yoho cuvún noo ra vaha vatyi tachí tuñun chi ñáyivi tyehe caa, Sutu Mañi yuhu, Nyoo ii cuvún ta iyón vityin ta nu quichaha tandíhi. ⁶Vatyi maa ñu cachati ñu ñiñi ñáyivi cuendon ta ñiñi ra cacuví profeta cuendon. Ta vityin yoho tari cha cunasacohun ñiñi chi ñu vatyi tyicuan caa tahán chi chi ñu —catyí ángel cuan.

⁷Ta chiñi tiqui vatyi cahan noo cha cahán ityi nu nyaá arta Nyoo tyehe caa:

—Ndicha, Sutu Mañi yuhu Nyoo, iyó tandíhi tunyee iñi chuun. Vityin cha yaha tachi tuñun chi ñáyivi chihin cha ndicha ta chihin cha ndaa —catyí cuan.

⁸Ta ángel cu cumi cuan coyo ra cha yihí chichi copa ra nu ñanyii. Ta chico ityi chi ñanyii cuan vatyi cahmi chi chi ñáyivi chihin ñuhu chi. ⁹Ta tandíhi ñu, quiñi xaan chahmí ñanyii chi ñu. Soco ña canasama ñu cuhva iyó ñu, ni ña casacahnu ñu chi Nyoo. Ta cahan ña vaha ñu siqui Nyoo ra cuví sanyehe tindoho chi ñu tyehe caa.

¹⁰Ta ángel cu ohon cuan coyo ra cha yihí chichi copa ra siqui tyayu quití quiñi caa cuan. Ta nduñaa ri nu nyacá ñaha ti. Ta ñáyivi cuenda ti, nyacua nacachi yihí ñu yaa ñu cha cuenda cha nyehé xaan ñu cha uhvi. ¹¹Soco ni tyicuan caa ta ña sandihí ñu cha sacuví ñu cha ña vaha. Ta cahán ña vaha ñu siqui Nyoo ra nyaá andivi cha cuenda cha uhvi chi ñu ta cha cuenda nu cahvi chi ñu.

¹²Ta ángel cu iñu cuan coyo ra cha yihí chichi copa ra siqui yuvi cahnu Eufates. Ta yuvi cuan na ityi chi tacuhva vatyi nuña noo ityi cha yaha ra cacuví rey cha vachi coyo ityi nu caña ñanyii. ¹³Tyicuan ta nyehí cha quitá yuhu quití quiñi caa cuan ta yuhu coo cahnu cuan ta yuhu ra cuví profeta cuendu. Vatyi caquitá coyo uñi tahan tatyí ña vaha yuhu ra cuan. Tari caá sahva caá tatyí ña vaha cuan. ¹⁴Ican ihya cuví tatyí cuihna cha casacuví milagru nahnu. Ta quitá coyo chi vatyi sandu iin ri chi tandihí rey cha iyó siqui ñuhu ñayivi, vatyi cacañi tahan ra quivi cusañaha Nyoo tyi iyó tandihí tunyee iñi chi ra. ¹⁵Ta catyí Nyoo:

—Nyehe ndo vatyi yuhu cha vachi tari noo ra suhu. Vatyi sana ri iñi ndo ta quihvi ra suhu vehe ndo. Sii xaan cucuvi chi ñáyivi nyatú tuhva ri quivi quichi. Ta vii cumí ñu sahma ñu (o cuñi chi catyí añima ñu) tacuhva cha ma cuvityiyaa ñu nu cua quichi, ta ma cucahan nuu ñu, catyí Nyoo.

¹⁶Ta cundu iin ri ra cacuví rey nu nañi chi chihin sahan hebreo Armagedón.

¹⁷Tyicuan ta ángel cu ucha cuan coyo ra cha yihí chichi copa ra nu tatyí, ta nya vehe ñuhu andivi nu nyaá Nyoo nu tyayu ra, quitá noo ndusu chaa xaan ta catyí chi:

—Cha cuví vityin —catyí ra.

¹⁸Tyicuan ta vaa ri maa cuví ta cahán savi ta quihvi tacha. Ta ñihi xaan taan siqui ñuhu ñayivi. Ta ndaha chicoo ñáyivi siqui ñuhu ñayivi, ta ña tuhva taan cha ñihi xaan tyicuan caa. ¹⁹Ta nu taan cuan ndata ñuu cahnu cuan, uñi nu ndata. Ta tandihí ca ñuu siqui ñuhu ñayivi canacoyo. Ta Nyoo nicohon iñi ra chi ñuu cahnu Babilonia cuan vatyi quiñi xaan sacuví ñu. Ta sanyehe xaan ra tindoho chi ñu vatyi cuxaan xaan ra chi ñu. ²⁰Tandihí ñuhú cha iyó chichi tyañuhu ta tandihí yucu, ndihí cuanaa. ²¹Ta nahnu xaan tucu savi yuu coon ityi andivi siqui ñáyivi. Ta vee xaan. Tari noo cha uvi xico kilu vee noo noo savi yuu cuan. Ta ñáyivi cahán ña vaha ñu siqui Nyoo cha cuenda tindoho savi yuu cuan, vatyi cuví chi noo tindoho cahnu xaan cha cuenda ñu.

Nu cua tachi tuñi Nyoo
chi noo ñaha cata iñi

17 Tyicuan ta chichi cha ucha tahan ángel cha cayihí ndaha ucha copa cuan, quichí noo ra nu nyaí, ta catyí ra chii:

—Ñaha tyi cusañahi chuun yoso caa cucutuñi chi ñaha cata iñi cahnu cha nyaá siqui tyañuhu. ²Vatyi ra cacuví rey siqui ñuhu ñayivi casacuví ra cha quiñi caa chihin ña, ta ñáyivi cha iyó siqui ñuhu ñáyivi, tiví xaan ñu chihin

cha quiñi caa cha sacuvi ña —catyí ra chii.

³Tyicuan ta nyehi noo cha sañaha Tatyí li Nyoo chii, ta chinyaca ángel cuan chii chiqui ndii nu yori maa ñáyivi iyó, ta yucuan nyehi chi noo ñaha, yosó ña siqui noo quití cuaha quiñi caa. Ta nyicú sivi cha cahán ña vaha siqui Nyoo chi ti. Ta ucha tahan xiñi ti nyaá ta uchi ndiqui ti. ⁴Ta ñaha cuan ñihno ña noo sahma tyacu nyaa ta tyacu cuaha. Ta cuaha xaan xuhun cuaan iñi chi ña, yuu tyaqui ta perla ñandihí. Ta yihí ndaha ña noo copa xuhun cuaan tyitú yihí chihin cha ña vaha ta cha quiñi caa cha sacuvi ña. ⁵Ta tyaan ña nyaá noo sivi cha cuví noo tuhun xehe cha ña cutuñi iñi ñáyivi. Vatyí catyí chi: “Ican ñaha sihi ihya cuví ñuu Babilonia cahnu, sihi tandihí ñu cha cata iñi ta tandihí cha ña vaha cha iyó siqui ñuhu ñayivi.” ⁶Tyicuan ta tuví iñi vatyí ñaha cuan chiñí ña chihin cha chihí ña níñi ñu cuenda Nyoo, ta ñu cha cachihí cha cuenda cha cahán ñu tuhun ra Jesús. Ta cha nyehi cuan, iyo xaan cuñí. ⁷Tyicuan ta catyí ángel cuan chii:

—¿Ñáá tuhun cha iyo xaan cuñún?
Cua sacote chuun ñáá cha cuñí chi catyí tuhun xehe ñaha sihi ihya ta quití quiñi caa cha yosó ña, quití cha nyicú ucha xiñi ta uchi ndiqui. ⁸Quití quiñi caa cha nyehun cuan, cuví ti noo quití cha chiyo ta vityin yori ca ti iyó. Soco cuquita ti chichi yavi cono xaan cha ñahri nu chitahan. Yucuan ñohó ti cha ni cumañi ca ndihí tuhun ti. Ta ñáyivi iyó siqui ñuhu ñayivi iyo xaan cucuñi ñu na nanyehe ñu chi

quití quiñi caa cha chiyo tyicuan, soco vityin yori ca ti iyó, soco cuquichi ti inga chaha. Ñu cua nyehe chi ti cuan, cuví ñu ñu cha ñahri sivi nyaá nu libru Nyoo nyata quivi chino ñuhu ñayivi. Ican libru cuan cucatyí yóó ñáyivi cuconyito tyicuan ri maa. ⁹Ihya cuví noo cha cuñí chi nacoto ndo: Ndi ucha xiñi ti cuan cuñí chi catyí ucha tahan yucu cha nyaá ñaha cuan siqui. ¹⁰Ta xiñi ti cuñí tucu chi catyí ucha tahan rey. Ta ohon tahan rey cuan cha yaha chinyaca ñaha ra. Ta rey cu iñu nyacá ñaha ra vityin. Ta ra cu ucha, cumañi ca cucunyaca ñaha ra. Ta quivi quichi ra nu ndihí, ña naha cucunyaca ñaha ra. ¹¹Ta chichi cha ucha tahan rey cuan, cunanyita noo ra inga chaha, ta ican ra cucuvi ra rey cu uña. Ta ican tucu ra cuví quití quiñi caa cha chiyo quivi cuan, ta vityin yori ca ti soco cunanyita ti inga chaha. Ta cha yaha cunyaca ñaha tucu ti, yucuan cuví nu cua ndihí tuhun ti.

¹²Ta ndi uchi tahan ndiqui cha nyehun cuan, cuñí chi catyí ndi uchi tahan rey cha cumañi ca cacunyaca ñaha. Soco cucoo ityi chi ra cha cunyaca ñaha ra noo ora, iin ri chihin quití quiñi caa cuan. ¹³Ndi uchi tahan rey cuan iin xaan ri cuhva cucaca xiñi ra. Ta cunacuhva ra tunyee iñi ra chi quití quiñi caa cuan. Ta tandihí ityi cha iyó chi ra cunacuhva ra chi ti. ¹⁴Ta cucacañi tahan ra chihin ra cuví Mbee Luhlu. Soco ra cuví Mbee Luhlu cuan, cucuvi chasaha ra chi ra. Vatyí ican ra cuví nuu chi tandihí ra nyacá ñaha. Ta cuví tucu ra nuu chi tandihí ra cacuví rey. Ta

ñu nyicú chihin ra, Nyoo nacana chi ñu ta nacachí ra chi ñu. Ta ñi xaan iñi ñu nyicón ñu chi ra.

¹⁵Ta catyí tucu ángel cuan chii ñandíhi:

—Tandíhi tyañuhu cha nyehun cuan, cha nyaá ñaha cata iñi cuan síqui, ican cuví ñáyivi tandíhi ñuu nyihi ta tandíhi ñuu nahnu, ñu siin siin sahan cahan. ¹⁶Ta ndí uchi ndíqui cha nyehun xiñi quití quiñi caa cuan cha cuví uchi tahan rey cuan, ican ra cuan cuasatasi iñi chi ñaha cata iñi cuan. Ta cusandoo ra chi ña cha notuhun ri maa ña. Ta cusanduvityiyaa ra chi ña. Ta cucachi ra coño ñuhu ña. Ta cutyihí ra chi ña nu cayú ñuhu. ¹⁷Vatyí Nyoo sana ndaha ra añima rey cuan vatyí casacuví ra cuhva cuñí maa ra. Vatyí iin ri cuhva cucaca xiñi ra, ta cucuhva ra ityi chí quití quiñi caa cuan cha cunyaca ñaha ti tari rey nyacua nya chino cava tuhun cahán maa Nyoo. ¹⁸Ñaha sihi cha nyehun cuan, ican cuví ñuu cahnu cha nyacá ñaha chí tandíhi ra cuví rey síqui ñuhu ñáyivi.

Nu cua tiví ñuu Babilonia

18 Cha yahañ tuhun ihya ta nyehí inga ángel cha vachi noó ityi andívi ta iyó xaan ityi chí ra. Ta ñuhu ñáyivi ndichin xaan nduví chihin cha ndichin ra. ²Ta ñihi xaan ndusu ra ta canachañ ra, ta catyí ra:

—Cha yahañ tuhun ñuu Babilonia cahnu cuan. Ta cha nanduví chi nu iyó ra ña vaha. Vehe tandíhi nuu tatyí ña vaha cha nanduví. Ta taca saa ña vaha nanduví ñandíhi. ³Vatyí tandíhi ñáyivi tiví ñu cha

cuenda cuatyí sacuví ñuu Babilonia cuan. Ta ra cacuví rey, ra nyacá ñaha síqui ñuhu ñáyivi tari cha cachiyo ra chihin ñaha cuan cha cuví ñuu Babilonia. Casacuví ra cuatyí chihin ña. Ta ra cha cuahan cuanaxico ñuu Babilonia cuan candutyayí ra chihin cha xico ra chí ñu ñuu cuan vatyí tandíhi cuhva ta sanaa ñu xuhun ñu chihin cha cata iñi ñu.

⁴Tyicuan ta chíñi nonga ndusu ityi andívi. Ta catyí chí:

—Quita ndo ñuu chiña, nyoho cha cuví ndo ñáyivi chí, tacuhva cha ma cutahan ndo sacuví ndo cuatyí chihin ñu chiña, tacuhva ma cutahan ndo ndoho ndo tari maa ñu. ⁵Vatyí cha caá ticuítí cuatyí ñu ñuu cuan, nyacua cha chañ chí nu nyaá Nyoo. Ta Nyoo cha nicohon iñi ra cha ña vaha sacuví ñu. ⁶Cuhva ndo chí ñu suri maa cha chahñ ñu chí inga ñáyivi. Ta uvi ca chaha sananyehe ndo tindoho síqui cha sacuví ñu. Cuhva ndo noo tindoho cunyehe ñu cha ñihi uvi ca chaha ican saha cha chahñ maa ñu chí inga ñáyivi. ⁷Yucuan chaha cuhva ndo cha iyo xaan tahan ñu chihin ta sanyehe xaan ndo tindoho chí ñu tari cuhva cha sacahnñ xaan ñu chí ñu ta cusíi xaan iñi ñu. Vatyí catyí ñuu cuan chichi añima chí: “Ihya nyaí tari noo reina. Ñima ñaha chíhi yíi cuví, ta ni ma cunyehe tindoho”, chicá iñi chí. ⁸Yucuan chaha chichi cha noo ri quívi cuquichi tindoho síqui ñuu cuan, cuquichi tuhun chíhi, cuquichi tucuihya iñi ta coo tama ñuu cuan, ta cucayu chí chihin ñuhu. Vatyí iyó xaan tunyee iñi chí Nyoo Sutu yo ta cutachi tuñi ra chí ñu ñuu cuan.

⁹Ra cacuví rey síqui ñuhu ñayivi ihya tari cha cachiyo ra chihin ñaha cha cuví ñuu cuan, cuacu chaa ra, cunducuihya xaan iñi ra na cananyehe ra ñuhma cha cayú ñuu cuan. ¹⁰Ta nya sava ri cucuitayucu ra cha cuenda cha cayuhvi ra tindoho cuan. Ta cucatyí ra:

—iNdahvi yoho, ñuu cahnu Babilonia, ñuu cha chiyo xaan tunyee iñi chii! Vatyí noo tuhun cuhva ta chaq tindoho nyehún —cucacatyí ra.

¹¹Ta ra cha canaxicó ñáá ndihi cha canaxicó, suri cucuacu chaa ra ta cucanducuihya iñi ra cha cuenda ñuu cuan. Vatyí yori ca sata cha canaxicó ra. ¹²Vatyí xicó ra xuhun cuaan, xuhun cuichin, yuu tyaquí, perla, sahma lino finu, sahma seda, ta sahma tyacu nyaa, ta tyacu cuaha. Ta nyisó tucu ra tandihi nuu vitu cha vixi chahán ta ñáá ndihi cha chinq chihin noho landa, vitu tyaquí, ta caa cha cuví bronce, ta caa cha cuví hierro, ta yuu cha cuví mármol. ¹³Ta nyisó tucu ra canela, ñáá ndihi ca cha vixi chahán, tari cutu, mirra, perfume, vinu, aceteye, yutyí paan finu, ta trigu. Ta suri nyisó tucu ra quití cuenda carga, ta mbee, caballo, carru. Ta nyacua nya ñanima ndahvi cha cuví musu ra ta caxico ra. ¹⁴Ta catyí ra chi ñáyivi ñuu cuan tyehe caa:

—Ñahri ca cha tyaquí cha chiyo chuun, cha tahán xaan iñun. Ta cha cuachiyo tandihi cha tyayiun. Ta ma cunañihi ca maun tandihi cuan —catyí ra.

¹⁵Ra cha caxicó tandihi ihya, candutyayí ra cha cuenda cha satá ñu ñuu cuan cha xicó ra. Cañi

cucuitayucu ra chihin cha cayuhvi ra cha cunyehe ñu cuan tindoho. Ta cucuacu chaa ra ta cunducuihya iñi ra. ¹⁶Ta cucatyí ra:

—iNdahvi ñuu cahnu cuan! Cuví chi tari noo ñaha síhi cha ñihnó sahma lino finu, sahma tyacu nyaa ta tyacu cuaha. Ta iyo yihí ña xuhun cuaan, ta yuu tyaquí ta perla. ¹⁷iVatyí noo tuhun ri cuhva ta ndihí cha tyayí xaan cuan! —cucatyí ra caxico cuan.

Ta tandihi ra cuví capitán cuenda barcu, chihin ñu cañoho chichi, tandihi ñu casahá tyiño nu tyañuhu, nya sava candoó ñu. ¹⁸Ta cha cananyehé ñu ñuhma cha cayú ñuu cuan, canachaa ñu, ta catyí ñu:

—¿Ñáá nonga ñuu chiyo tari ñuu cahnu ihya? Ñahri ca —cucatyí ñu.

¹⁹Ta tyicu ñu niyaca xiñi ñu, ta chacu chaa ñu. Ta cuihya iñi ñu, ta canachaa ñu ta catyí ñu:

—iNdahvi nduvi yo cha cuanaa ñuu cuan! Vatyí chihin cha tyayí ñuu cahnu cuan ndutyayí tandihi yo, ñu chicá noo nu tyañuhu chihin barcu. iTa vityin noo tuhun cuhva luhlu ri ta cuanaa chi! —catyí ñu.

²⁰Soco cusí cuñi nyoho cha cuenda ñuu cuan, nyoho cha iyó andivi, nyoho ñu yihí cuenda Nyoo ta nyoho ra cachicá tyiño ra Cristo ta nyoho ra cacuví profeta Nyoo. Cusí cuñi ndo vatyí cha cuenda ndo ta tachí tuñi Nyoo chi ñu cuan, ta cha cuenda cha ña vaha cha sacuvi ñu chihin ndo.

²¹Tyicuan ta noo ángel cha iyó xaan tunyee iñi chi, nacoñehé ra noo yuu molino cahnu xaan ta tuchi ra cuahan nu tyañuhu, ta catyí ra:

—Suri tyehe caa cundihi tuhun ñuu Babilonia cahnu, Ta ni inga ca chaha ta ma nyehe ca ndo chi ñu. ²²Ta ma cuiñi con yaa ityi chichi ñuu cuan, vatyí yori ca cusacuacu arpa, ta ni flauta, ta ni trompeta, ta ma tiví ca ñu. Ta ni ma coo ca ra casahá tyiño ñáá ndihi tyiño. Ta ni ma tyacu ca cha cayu molino. ²³Ta ni nonga ñuhú tima, ta ma cayu ca chichi ñuu cuan. Ta ni nonga chaha ta ma cuiñi yo ndusu ñu cha iyó ñu vico tandaha. Vasi ra canaxico cha chiyo ñuu cuan, ican ra cuví ra cahnu ca cuvi nuu ñáyivi iyó siqui ñuhu ñayivi. Nyoho ñu Babilonia, sandaví ñaha xaan ndo chi tandihi ñáyivi iyó siqui ñuhu ñayivi chihin cha sataxi ndo.

²⁴Vatyí cuaha xaan ñiñi ra cacuví profeta Nyoo iñi chichi ñuu cuan vatyí chahñi ñu chi ra. Ta iñi tucu ñiñi ñu cuenda Nyoo, ta ñiñi tandihi ñu cha cachahñi ñáyivi nicahnu ñuhu ñayivi.

19 Cha yahá cuan, ta chiñi noo ndusu cha cuaha vavaha ñáyivi nya andivi. Ta catyí ñu:

iCahnu xaan cuví Nyoo! Sutú Mañi yo, Nyoo cuví ra ra sacacú chi yo. Ta chi maa ra tahán chi cha sacahnu yo, tyi iyó xaan tunyee iñi chi ra.

²Vatyí vaha sacutuñi ra chihin cha ndaa ta chihin cha ndicha.

Tachí tuñi ra chi ñaha cata iñi cuan.

Vatyí sativi xaan ña chi ñáyivi iyó siqui ñuhu ñayivi chihin cha quiñi caa cha sacuví ña chihin ñu.

Ta yucuan chaha tachí tuñi ra chi ña, ta cha cuenda cha chahñi ña chi ñu sacuví tyiño nuu ra.

³Ta quichaha catyí ñu inga chaha: —iCahnu xaan cuví Nyoo! Ñuhma cha cayú ña, ma cucuita ca maa cha ndaa chi ityi siqui —catyí ñu.

⁴Ta ndi oco cumi ra cha vaha chahnu ta ndi cumi tahan cha nyitó cha nyicú nu nyaá tyayu Nyoo, cachicuiñi chiti ra nya nu ñuhú. Ta casacahnú ra chi Nyoo nu nyaá ra nu tyayu ra. Ta catyí ra:

—iNa cuvi chi tyicuan caa! iCahnu xaan cuví Nyoo! —cacatyí ra.

⁵Ta nu nyaá tyayu Nyoo, tyacu noo ndusu, ta catyí chi:

Sacahnu ndo chi Sutú yo Nyoo Tandihi nyoho cha sacuví ndo tyiño nuu ra, ta quichahá ndo chi ra, vasi nyihi ndo, o chahnu ndo.

Nu cua tandaha ra cuví Mbee Luhlu chihin ñáyivi chinó iñi chi ra

⁶Ta chiñi tiqui noo ndusu tari cha cuaha vavaha ñáyivi cahán, tari ndusu nu cuaha xaan yuvi ndutya, ta tari cha ñihi xaan cahán savi. Ta catyí chi:

iCahnu xaan cuví Sutú yo Nyoo! Vatyí cha quichahá nyaca ñaha ra ta iyó tandihi tunyee iñi chi ra.

⁷Na cusii cuñi yo ta na cutu yo chihin tusii iñi. Na sacahnu yo chi ra.

Vatyí cha chaá cuhva cha cua coo yo vico tandaha ra cuví Mbee Luhlu.

Ta yoó cuacuvi yo tari noo ñasihí ra, cha nyatú tuhva ri yo quívi tandaha yo chihin ra.

⁸Ta maa yo cucuihno yo sahma linu finu, ndíi ta cuichin.

Vatyi sahma linu finu cuan cuñí chi catyí cha vaha cha sacuví ñáyivi cuenda ra.

⁹Tyicuan ta quichaha catyí ángel cuan chi:

—Tyaa tuhun ihya nu tutu: “iSii xaan cuví chi ñu cha nyaá cahun vico tandaha ra cuví Mbee Luhlu!”

Ta catyí tucu ra chii tyehe caa:

—Ican ihya cuví tuhun ndicha Nyoo —catyí ra chii.

¹⁰Tyicuan ta chicuiñi chiti chaha ángel Nyoo cuan vatyi sacahni chi ra, soco catyí ra chii:

—Ma sacahnun chii, vatyi musu Nyoo cuví tucu yuhu tari yoho, ta tari tandíhi ra yañi yo cha nyicón tuhun ndicha ra Jesucristo. Chi Nyoo tahán chi sacahnu yo —catyí ra chii.

Vatyi tuhun ndicha ra Jesús, ican cuví cha chahá cuhva chi ra cacuví profeta, ra cha cachahá cuenda tuhun cahán Nyoo chihin yo.

Nu sañahá chi cuenda ra cha yosó caballu cuichin

¹¹Tyicuan ta nyehi tanuña andívi. Tyicuan ta tuví noo caballu cuichin. Ta ra yosó chi tí nañí ra Ra Ndicha Cha Nii Iñi Sacuvi Tyiño Nuu Nyoo. Vatyi chihin cha ndaa sacutuñi ra chí ñáyivi, ta cañi tahan ra chihin cha ña vaha chihin cha ndaa.

¹²Xiño xaan chiti nuu ra tari cha cayú ñuhu. Ta cuaha xaan corona yihí xiñi ra. Ta nyaá noo sivi chi ra cha noo tuhun ri maa ra chító

ra ñáá sivi nyaá chi ra. ¹³Ta ñihnó ra noo sahma iñi niñi. Ta maa ra nañí ra Tuhun Cahán Nyoo. ¹⁴Ta canyicón sindaro andívi chi ra, cañihnó ra sahma linu finu, sahma cuichin ta ndíi. Ta cayosó ra caballu cuichin. ¹⁵Ta chichi yuhu ra nañí Tuhun Cahán Nyoo cuan, quitá noo mityi cha xaan ni nduvi chiyo yuhu, vatyi chihin tuhun cahán ra cusañicuehe ra ñáyivi iyó siqui ñuhu ñáyivi. Ta ñihi cunyaca ñaha ra chí ñu tari chihin noo yutun caa. Maa ra cutachi tuñi ra chí ñu tari noo ra cha sacunyihi tichaha ndívi chihin chaha ra. Ta cusacoho ra vinu uva chí ñu, ta ihya cuñí chi catyí tyi cuxaan Nyoo chihin ñu ta cutachi tuñi ra chí ñu vatyi chaha xaan ñu tisihi chí Nyoo ra iyó tandíhi tunyee iñi chii. ¹⁶Ta nu sahma ra ta nu sihin ra cuan nyaá letra cha catyí tyehe caa: “Ihya cuví Ra cuví nuu chí tandíhi rey. Ta ican ra cuví nuu chí tandíhi ra nyacá ñaha.”

¹⁷Tyicuan ta nyehi chí nonga ángel nanyaá ra nu ñanyii. Ta chihin tandíhi fuerza ra canachaa ra chí tandíhi saa cha candavá ityi andívi, ta catyí ra chí tí:

—Ñaha ndo ta candu iin ri ndo vatyi cuxiñi ndo cha chahá Nyoo cachi ndo. ¹⁸Vatyi cachi ndo coño ra cacuví rey ta ra cuví nuu chí sindaro ta chí ra ndachan xaan saha chii. Ta cachi ndo coño caballu ta coño ñuhu ra cha cayosó chí tí. Cachi ndo coño tandíhi ra, vasi ra yori chitoho o ra iyó chitoho, vasi ra nyihi o ra chahnu —catyí ra chí saa.

¹⁹Tyicuan ta nyehi chí quití quiñi caa cuan ta chí ra cacuví rey

cha iyó siqui ñuhu ñayivi_i chihin sindaro cuenda ra, vatyí candu iin ri ra vatyí cacañi tahan ra chihin ra yosó caballu cuichin cuan ta chihin sindaro cuenda ra. ²⁰Ta tñin ra chi quití quiñi caa cuan iin ri chihin ra cuví profeta cuendu cuan, vatyí chihin nuu quití quiñi caa cuan ta sacuvi_i ra cuendu cuan milagru, ta sandavi_i ñaha ra chi ñáyivi_i cha chahá chi cunyaa tuñi quití quiñi caa cuan, ta chi ñu sacahnú chi xiñahñu ti. Ta nyitó nyitó ra ta tuchi ra yosó caballu cuichin chi ninduvi ra nu ñuhu_i cha cayú chihin azufre. ²¹Ta tandíhi ca ñu cachihí ñu chihin mityi xaan cha quitá yuhu ra cha yosó caballu cuichin cuan. Ta tandíhi maa saa, cachachi_i xaan ti coño ñu.

Nu sañahá chi cuenda noo mil cuiya

20 Cha yaha_i tuhun cuan ta nyehi_i chi noo ángel vachi noó ityi andivi ta yihí ndaha ra ndaha ticu yuvehe yavi cono cuan. Ta yihí tucu ndaha ra noo cadena cahnu. ²Ángel ihya tñin ra chi coo cahnu cuan, quití cha cuví Coo Chahnu cuan, cha cuví cuihna. Ta chahñi_i ra chi ti chihin cadena noo mil cuiya. ³Ta tuchi_i ra chi ti yavi cono cuan. Ta yucuan nacasi_i ra chi ti. Ta tyaá ra noo sellu yuvehe cuan tacuhva cha ma sandavi_i ñaha ca ti chi ñáyivi iyó siqui ñuhu ñayivi_i, nyacua nya cha yaha noo mil cuiya. Ta cha yaha noo mil cuiya cuan ta cundachi tucu ti suhva ca quivi.

⁴Yaha_i cuan ta nanyehi_i cuaha xaan tyayu tayucú. Ta nuu chi nyicú ñu cha chicoq ityi chi vatyí tachi tuñi ñu chi ñáyivi_i. Ta nyehe

tiqui añima ñu chahnya_i ñáyivi_i xiñi cha cuenda cha cahán ñu tuhun Nyoo cha chahá cuenda ra Jesús chi ñu. Ta maa ñu, ña sacahnú ñu chi quití quiñi caa cuan, ni chi xiñahñu ti, ni ña chahá ñu chi ñu cha cunyaa tuñi ti tyaan ñu, ni ndaha ñu. Nyehi_i vatyí ican ñu ihya, canandoto ñu ta chicunyaca_i ñaha ñu chihin ra Cristo noo mil cuiya. ⁵Ican ñu ihya cuví cha nandoto_i cha xihna ca. Soco inga ityi ndiyi ña nandoto_i ñu nyacua nya cha yaha_i mil cuiya cuan. ⁶iSi_i xaan cuñí ñu ii cuenda Nyoo, ñu cha tahán chi nandoto cha xihna ri! Ta ma cuhun ñu tuhun chihi cu uvi nu cuví anyaya nu tachí tuñi Nyoo chi añima ña vaha. Vatyí cucuvi_i ñu sutu cha cuenda Nyoo ta cuenda ra Cristo. Ta cucunyaca_i ñaha ñu mil cuiya chihin ra. ⁷Ta cha yaha mil cuiya cuan, tyicuan ta cundachi cuihna nu ñohó ra vehe caa. ⁸Ta cuquita ra, ta cusandavi_i ñaha ra chi ñáyivi_i nicahnu siqui ñuhu ñayivi_i. Cuquita_i ra vatyí cusandavi_i ñaha ra chi ñáyivi_i Gog ta Magog, ñu xaan iñi chi Nyoo. Ta cusandu iin ri ra chi sindaro ñuu cuan vatyí cuhun ra cuatyí. Cuaha xaan ra, tari maa ñiti yuhu tyañuhu. ⁹Tyicuan ta cuahan coyo ra nicacahnu siqui ñuhu ñayivi_i. Ta cachasi_i cutya ra nu iyó ñu cuenda Nyoo ñuu Jerusalén nu cuñí xaan Nyoo. Soco Nyoo cusaquichi ra ñuhu_i ityi andivi ta cucahmi chi chi tandíhi sindaro cuan. ¹⁰Ta cuihna cha sandavi_i ñaha chi ñu, cutuchi Nyoo chi ra chichi anyaya cahnu nu cayú ñuhu_i chihin azufre, nu tuchi_i tucu ra chi quití quiñi caa cuan ta chi ra cha cuví

profeta cuendu. Ta yucuan cunyehe ra tindoho tyicuan ri maa ndiyaca ta ñiyaca.

Nu cua cutuñi chi ñáyivi nu tyayu cuichin nu nyaá Nyoo

¹¹Tyicuan ta nyehi noo tyayu cuichin cahnu. Ta nyehi chi ra nyaá nuu tyayu cuan. Ta chihin nuu ra ta cuanaa ñuhu ñayivi ta andivi. Ta ñahri ca maa nu cucunyaa chi. ¹²Ta nyehi chi tandihi ñu ndiyi, ñu chahnu ta ñu nyihi, tayucú ñu nuu Nyoo. Tyicuan ta canuñá libru cha nyaá tandihi cha sacuvi ñu quivi chiyo ñu ñayivi. Ta nuña tucu inga libru cha nyaá sivi ñu cha cuconyito tyicuan ri maa chihin Nyoo. Ñu ndiyi cuan cuacutuñi chi ñu ñáá ndihi cha chinyacuvi ñu cha nyaá nu tandihi libru cuan. ¹³Ta tyañuhu nacuhva cuenda chi chi ndiyi cha cumí chi. Ta tandihi nu nyicú ñu chihí nu nyacá ñaha Tuhun Chihi, nacuhva cuenda chi ndiyi cha cumí chi. Ta tandihi ñu cuatahan chi chi ñu yoso cuhva cha casacuvi ñu. ¹⁴Tyicuan ta cundihí Tuhun Chihi cuan ta ñahri ca nu cuacunyicu ñu chihi, vatyí cutuchi Nyoo chi ninduvi tahan cuan chichi anyaya cahnu nu cayú ñuhu. Ta ican ihya cuví Tuhun Chihi Cu Uvi. ¹⁵Ta yucuan tuchi ra chi ñu cha ñahri sivi nyaá nu libru cha cuenda ñáyivi cha cua conyito chihin Nyoo tyicuan ri maa.

Nu nyehe ra Juan andivi chaa ta ñuhu ñayivi chaa

21 Yahá cuan ta nyehi noo andivi chaa ta noo ñuhu ñayivi chaa, vatyí andivi ta ñuhu

ñayivi cha xihna ri cuanaa chi. Ta tyicuan caa tucu tyañuhu, cuanaa tucu cuan. ²Yuhu ra Juan nyehi ñuu ii Jerusalén chaa cha vachi noó ityi andivi nu nyaá Nyoo. Ta tyaqui xaan nduvii chi tari noo ñaha cha cua tandaha chihin noo ra, tyicuan caa nduvii chi. ³Ta chiñi noo ndusu ñihi cha quita ityi andivi, ta catyí chi:

—iNyehe ihya! Nyoo, iyó ra mahñu ñáyivi. Ta cua coo ra chihin ñu. Ta maa ñu cua cuvi ñu ñuu ra. Ta cua cunyaa ra chihin ñu. Ta cua cuvi ra Nyoo cuenda ñu. ⁴Ta Nyoo cunacuhva ra ndutya nuu ñu. Ta ma cúvi ca ñu. Ta ma cucuihya ca ñi ñu. Ma cuacu ca ñu vatyí ma nyehe ca ñu tindoho. Ta ma nyehe ca ñu cha uhvi. Vatyí tandihi cha chiyo, cha yahá tuhun —catyí chi.

⁵Tyicuan ta Nyoo, ra cha nyaá nu tyayu cahnu, catyí ra:

—Nyehe. Sanduchaj tandihi maa cha iyó.

Ta catyí tucu ra:

—Tyaa tuhun ihya, vatyí tuhun cahín ihya, ndicha. Ta cuví cunii iñun vatyí tuhun cahín cuchino cava —catyí Nyoo chii.

⁶Yahá cuan ta catyí tucu ra chii: —Cha tandihi chino cava vityin. Yuhu cuví ra xihna cuiri, ta yuhu cundoí nu ndihi tuhun. Ñáyivi cha ityi ndutya cha cuñi ñu tuhun yuhu, cucuhve ndutya cha chahá ñayivi cha ma naa ca maa coho ñu, ta ñahri cutyiyahvi ñu. ⁷Ñu cha cuví chasaha chi ra ña vaha, cuñihi ñu tandihi ihya, tari noo cha cundoo chi ñu. Ta yuhu cucuvi Nyoo cuenda ñu ta maa ñu cucuvi ñu sehi. ⁸Soco ñáyivi cha yuhví xaan, ñu

cha ña chinó iñi, ñu cha quiñi iyó, ñu cha chahñi ñáyivi, ñu iyó chihin rayii, ta ñima yii ñu cuví, o ra iyó chihin ñusihi ta ñima ñasihi ra cuví, ñu tasi, ñu casacahnú xitohyo, ta tandihi ñu cuendu, tandihi ñu cuan, tahán chi cuhun ñu chichi anyaya cahnu nu cayú ñuhu chihin azufre, nu cuví Tuhun Chihi Cu Uvi, nu tachi tuñi Nyoo chi añima ña vaha.

Nu nyehę ra Juan yoso caa cucuvi ñuu Jerusalén chaa

⁹Tyicuan ta quichi noo ángel cha ucha tahan cuan, ra cha canyisó ndi ucha copa tyitú chihin ndi ucha tahan tindoho cuan. Ta cahán ra chihin ta catyí ra:

—Ñaha, ta cusañahi chuun yóó ñu cuví ñu yihí cuenda ra Cristo, ñu cha cuví tari ñasihi ra, tyi ra cuví Mbee Luhlu cuví ra —catyí ra chii.

¹⁰Ta Tatyí Ii Nyoo chinyaca chii noo yucu cahnu ta sucun. Ta sañaha ra ñuu ii, ñuu Jerusalén cahnu cuan chii. Maa maa cuhva cha vachi noó ñuu cuan ityi andivi nu nyaá Nyoo, sañaha ra chii. ¹¹Xiño xaan ñuu cuan chihin cha tyaqui Nyoo. Xiño xaan tari caá noo yuu tyaqui, tari caá yuu jaspe, ta xiño tari ino. ¹²Nicachico ñuu cuan sucun xaan sama. Ta iyó uchi uvi tahan yuvehe. Ta noo ángel nanyaá tahan tahan yuvehe. Ta ndi uchi uvi tahan sivi tata ñáyivi Israel nyaá yuvehe cuan. ¹³Uñi tahan yuvehe cuan nyaá ityi nu caña ñanyii. Ta uñi tahan ityi norte. Ta uñi tahan ityi tyañuhu. Ta uñi tahan ityi nu quee ñanyii. ¹⁴Uchi uvi tahan yuu yihí nu sama ra nu cacu chaha chi. Ta nuu yuu cuan nyaá sivi ndi uchi uvi apóstol cuenda ra cuví Mbee Luhlu.

¹⁵Ta ángel cha cahán chihin cuan, yihí ndaha ra noo yutun xuhun cuaan, vatyí chihin cuan cutyicuhva ra ñuhú ñuu cuan, ta yuvehe ta nu sama nicachico ñuu cuan. ¹⁶Cumi tahan tutun ñuu cuan nyaá. Ta inuu ri cuhva cha quehen ta cha cañi. Ta ángel cuan tyicuhva ra ñuu cuan chihin yutun xuhun cuaan cuan. Ta tyicuhva ra, ta quita uvi mil uvi cientu kilómetro. Ta inuu ri cha cañi ta cha sucun ta cha quehen. ¹⁷Tyicuan ta tyicuhva ra nu sama nicachico ñuu cuan. Ta quita uñi xico cumi metru cha cocon, tari tyicuhvá ñáyivi, tyicuan caa tyicuhva ángel cuan.

¹⁸Chihin yuu jaspe sama yuhu ñuu cuan. Ta maa maa ri xuhun cuaan cuví ñuu cuan. Tari caá noo ino cha ndii vavaha, tyicuan caa. ¹⁹Ta yuu cha cuví cimientu cuan tandihi ri maa nuu yuu tyaqui cuví: yuu cha xihna ri cuví jaspe; yuu cha cu uvi cuví yuu zafiro; yuu cha cu uñi cuví yuu ágata; yuu cha cu cumi cuví yuu esmeralda; ²⁰ta yuu cu ohon cuví yuu ónice; ta cha cu iñu cornalina; ta cha cu ucha crisólito; ta cha cu uña berilo; ta cha cu iin topacio; ta cha cu uchi crisoprasa; ta cha cu uchi iin jacinto; ta yuu cu uchi uvi cuví amatista. ²¹Ndi uchi uvi yuvehe cuan cuví chi uchi uvi tahan perla. Tahan tahan yuvehe cuan, ta ching chi chihin noo ri perla. Ta nu cuví ityi cahnu ñuu cuan, maa ri maa xuhun cuaan cuví, tari ino cha xiño.

²²Ni noo vehe ñuhu ña nyehí chichi ñuu cuan, vatyí Sutu yo Nyoo, ra iyó tandihi tunyee iñi chii, ican cuví vehe ñuhu ñu cuan,

ta tyicuan caa tucu ra cuví Mbee Luhlu. ²³Ñuu cuan ña chiñuhú cha sacundichín ñanyii. Ta ni cha ndichin yoo ta ña chiñuhú. Vatyí suri maa cha ndichin Nyoo chihin ra cuví Mbee Luhlu cuví cha sacundichin chichi ñuu cuan. ²⁴Tandihí ñu cha cacu añima, cucaca noo ñu nu ndichin ñuu cuan. Ta ra cacuví rey siquí ñuhu ñayiví cunyaca ra cha tyayii ra ta cuhva cuenda ra tandihí cha cahnu cacuví ra chi ñuu cuan. ²⁵Ta ma nacunyasi yuvehe cha ñicahñu, ta yucuan ma coo cha cha cuaa. ²⁶Ta tandihí cha tyayii, ta cha cahnu, cha iyó siquí ñuhu ñayiví cuchaa chi nya ñuu cuan. ²⁷Soco ma cuvi quihvi cha quiñi caa. Ni noo ñu sacuví cha quiñi caa, ni ñu cuendu ma cuvi quihvi ñu. Noo ri maa ñu nyaá sivi nu libru ra cuví Mbee Luhlu cuquihvi ñu, vatyí cuconyito ñu chihin ra tyicuan ri maa.

22 Tyicuan ta sañahá ángel cuan noo yuvi cuii vavaha chii. Nduya cha chahá cha conyito yo cuví. Cuii vavaha tari noo yutyí finu. Ta quitá yuvi cuan nuu nyaá tyayu Nyoo ta nu nyaá ra cuví Mbee Luhlu. ²Mahñu ityi cahnu ñuu cuan ta ninduvi chiyo yuvi cuan, nanyaá yutun cha chahá cha conyito yo. Ta uchi uvi chaha cha noo cuiya chahá tun chiti. Tahan tahan ri yoo chahá tun chiti. Ta ndaha tun, vaha cha cuví tatan chi ñáyivi iyó siquí ñuhu ñayiví. ³Ñuu cuan, ñahri maa cha ña vaha cucoo vatyí yucuan nyaá Nyoo nu tyayu ra ta cucunyaca ñaha ra chihin ra cuví Mbee Luhlu. Ta cusacahnu ñu cuenda ra chi ra. ⁴Ta cunyehe ñu

chi ra chihin nuu ñu. Ta cua cunyaa sivi ra tyaan ñu. ⁵Ta ma coo ca cha cha cuaa yucuan. Ta ñu coo yucuan ma cuchíñuhu ñuhu lámpara chi ñu, ni ñuhu ñanyii. Vatyí Nyoo Sutu yo cusacundichin ra nu nyicú ñu. Ta maa ñu cucunyaca ñaha ñu chihin ra tyicuan ri maa.

Nu sañahá chi vatyí cha cuyatyin quichi ra Cristo

⁶Tyicuan ta catyí ángel cuan chii: —Ihya tuhun ndicha cuví, ta cuví cuniñi iñun vatyí cuchino cava tuhun ihya. Ta suri maa Sutu yo Nyoo ra cahán chihin yuhu ra cacuví profeta cuenda ra ta cha naha, ican ra tachí ra chi ángel ra, vatyí sañaha ra chi ñu sacuví tyiño nuu ra yoso caa cucuvi cha numi ri —catyí ra.

Ta catyí Sutu Mañi yo:

⁷—iCha cuñi quichi! —catyí ra.

iSiñi xaan cuñi ñu cha sacuví cuhva cahán tuhun Nyoo cha nyaá nu libru ihya!

⁸Yuhu ra Juan, chiñi tuhun ihya. Ta nyehi tandihí ihya. Ta cha yahá nyehi ta chiñi, chicuñi chiti chaha ángel cha sañahá cuan chii, vatyí sacahni chi ra. ⁹Soco maa ra catyí ra chii:

—Ma sacahnnun chii, vatyí yuhu, musu Nyoo cuví, tari yoho. Ta yañun cuví, tari ra yañi yo cha cacuví profeta cuenda Nyoo, ta tari tandihí ñu quichahá tuhun cha nyaá nu libru ihya. Chi Nyoo tahán chi sacahnu yo —catyí ra chii.

¹⁰Ta catyí tucu ra chii:

—Ma tixehun tuhun Nyoo cha nyaá nu libru ihya, vatyí cha cuyatyin quivi cha cuchino cava

chi. ¹¹Soco saña chi ñu quiñi iyó, na sacuvi ca maa ñu cuhva cuñi maa ñu. Ta ñu sacuvi cuatyí na sacuvi ca maa ñu. Soco ñu sacuvi cha vaha, na sacuvi ca ñu cha vaha. Ta ñu ii, ñu nacuhva cuenda añima chi Nyoo, na cu ñi ca ñi ñu chihin ra —catyí ra chii.

¹²Ta Sutu Mañi yo catyí ra:

—Nyēhe ndo. Cha cuyatyin quivi quichi. Ta cutiyahvi chi tahan tahan ñáyivi yoso cuhva cha sacuvi ñu, tatu cha vaha o cha ña vaha.

¹³Yuhu cuví ra xihna cuiri ta yuhu cundoí nu ndihi tuhun, yuhu iyé nu quichaha tandihi ta cucoo que nu cundihi tuhun —catyí Sutu Mañi yo.

¹⁴Sií xaan cucuvi chi ñu sanduvii sahma o añima cuví cuan, vatyí coo ityi chi ñu cachi ñu chiti yutun cha chahá cha conyito añima yo tyicuan ri maa. Ta cuví quihvi ñu yuvehe ñuu cuan. ¹⁵Soco ñu cha sacuvi cha quiñi caa, ñu tasi, ñu cha iyó chihin tahan, ta ñima ñasihi ra o yí ñu cuví, ñu chahñi ñáyivi, ñu sacahnú xitohyo, ta tandihi ñu ñii cuendu ta sandavi ñaha ñu, tandihi ñu cuan, cundoó ñu ityi chata ñuu cuan.

¹⁶Ta catyí tucu Sutu Mañi yo:

—Yuhu ra Jesús, sacuhin chi ángel cuende vatyí sacoto ra tandihi tuhun ihya chi ñu nyicú vehe ñuhu. Yuhu cuví ñáyivi chahnu chi rey David. Ta vachi tiqui tata ra ñandihí. Ta cuví tiqui tiñoó cahnu cha xiño, cha caña cha ñaa ca — catyí ra.

¹⁷Tatyí Ii Nyoo ta ñasihi ra cuví Mbee Luhlu cha cuví ñu cuenda ra, catyí ñu tyehe caa:

—Ñaha, Sutu Mañi yuhu —catyí ñu.

Ta ñu chiñi tuhun ihya, ta catyí ñu chi ra:

—Ñaha —catyí ñu.

Ta ñu ityi ndutya cha conyito yo chihin, ta tandihi ñu cuñi quichi, na quichi ñu ta coho ñu ndutya cha chahá cha conyito añima yo, ta ñahri cutiyahvi ñu.

¹⁸Ta yuhu catyí chi tandihi ndo cha chiñi ndo tuhun Nyoo cha nyaá nu libru ihya, yuhu sacoté chi ndo noo tuhun ihya: Tatu nya noo ñáyivi sanducuaha ca ñu tuhun ihya, Nyoo cunatyiso ca ra tindoho cha nyaá nu libru ihya siqui ñu.

¹⁹Ta tatu nya noo ñáyivi tinyaa ñu suhva tuhun Nyoo cha nyaá nu libru ihya, Nyoo cu tinyaa ra cha tahán chi chi ñu cha nyaá nu libru cha cahán chi tuhun cha cuconyito ñu tyicuan ri maa ta cucoo ñu ñuu ii cuan. Ta ma tahan ca chi chi ñu cha vaha cha cahán nu libru ihya.

²⁰Ta Sutu Mañi yo ra cha chahá cuenda ihya catyí ra tyehe caa:

—Cha ndicha vatyí cha cuñi quichi —catyí ra.

Ta yuhu catyí:

—Na cuvi chi tyicuan caa. Ñaha, Sutu Mañi yuhu, Jesús —catyí yuhu.

²¹Na naquehen tandihi ndo cha vaha chahá Sutu Mañi yo Jesucristo chi yo. Ta na cuvi chi tyicuan caa.